

అపూర్వం



విక్టోరియా

కాండార కుటుంబ వాణిజ్య అకాడమి

బొంబే గాడ్ కుటుంబ కుటుంబ

'TULU SHORT STORIES FOR CHILDREN' SERIES

APPODADYE by Muddu Moodubelle

Published by Karnataka Tulu Sahithya Academy, Corporation Building, Lalbhag, Mangalore - 575003.

ಪ್ರಥಮ ಮುದ್ರಣ : 1998

ಬೆಲೆ : ರೂ. 15

ಪುಟಗಳು : 32

ಪ್ರಧಾನ ಸಂಪಾದಕ : ಡಾ. ಬಿ.ಎ. ವಿವೇಕ ರೈ
ಅಧ್ಯಕ್ಷರು
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಪ್ರಕಾಶಕರು : ಎಸ್.ಎಚ್. ಶಿವರುದ್ರಪ್ಪ
ಪ್ರಭಾರ ರಿಜಿಸ್ಟ್ರಾರ್
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಹಕ್ಕುಗಳು : ಅಕಾಡೆಮಿ

ಮುಖಪುಟ
ಮತ್ತು ಚಿತ್ರಗಳು : ಗೋಪಾಡ್ಕರ್

ಮುದ್ರಣ : ಆಕೃತಿ ಕಂಪ್ಯೂಟರ್ಸ್, ಮೈದಾನ 4ನೇ ಅಡ್ಡ ರಸ್ತೆ, ಮಂಗಳೂರು - 575001

BVP-1681

10/10/17


G-2333

73/84

ಜೋಕುಲೆಗಾದ್ ತುಳು ಕತೆಕುಲು - 16

ಅಪ್ಪೊದಡ್ಯ

ಮುದ್ದು ಮೂಡುಬೆಳ್ಳಿ



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಲಾಲ್‌ಬಾಗ್, ಮಂಗಳೂರು - 575003

ಅಧ್ಯಕ್ಷರನ ಮದಿಪು

ತುಳುನಾಡ್‌ಡ್ ಪ್ರಾಕ್ರಾಡ್‌ದಿಂಚಿ ನಮ್ಮ ಹಿರಿಯಾಕುಲು ಪಂಡೊಂದು ಬತ್ತಿಂಚಿ ಅಜ್ಜಿ ಕತೆಕುಲು, ಪಾಡ್ಡನದ ಕತೆಕುಲು ಒಂಚಿ ಕಾಲೊಡು ನಮ್ಮ ತುಳುವರೆಗ್ ಅಕಾಲ್ ಚರಿತ್ರನ್ ತೆರಿಪಾಯಿನ ಕಲ್ಪಾಯಿನ ವಿದ್ಯೆಲು. ಕೋಟಿ ಚೆನ್ನಯೆರ್, ಸಿರಿ, ಅಬ್ಬಗೆ ದಾರಗೆ, ದೇವು ಪೂಂಚೆ, ಅಗೋಳಿ ಮಂಜಣೆ, ಪುಳ್ಳೂರು ಬಾಚೆ, ಪರತಿ ಮಂಗಳಣೆ ಇಂಚಿ ವಿತೇತೋ ಆಂಚೊವು ಪೊಂಚೊವಲೆನ ಪುದರ್‌ಲೆನ್, ಕತೆಕಾಲ್‌ನ್ ನಮ್ಮ ಹಿರಿಯಾಕುಲು ಕೇಂಡೊಂದು ಕಲ್ಪೊಂದು ಮಲ್ಲೆ ಆತರ್. ಒಂಚಿ ಕಾಲದ ಅಜ್ಜಿ ಅಜ್ಜೆರ್ಕುಲು ಪುಳ್ಳೆಲ್ಗ್ ಪನೊಂದಿತ್ತಿನ ಕತೆಕ್ಲೆಡ್ ಕುಸಾಲ್ ಇತ್ತಂಡ್, ಕುಸೆಲ್ ಇತ್ತಂಡ್. ಕನಕಟ್ಟುನ, ಗೇನ ಪುಟ್ಟಾವುನ ಶಕ್ತಿ ಇತ್ತಂಡ್. ತೆಲ್ತ್ ತೆಲ್ತ್‌ದ್ ಬಂಚಿ ಉರ್ಕಾಪು ಉಲ್ಲಾಸ ಇತ್ತಂಡ್. ಇಂಚಿ ತೆಲಿಪುನ ಯೋಚನೆ ಮಲ್ಪುನ ಪೊಸ ಲೋಕೊಗು ಪೋಪುನ, ಪೊಸ ಸಾದಿ ಪತ್ತುನ, ಪೊಸ ವಿದ್ಯೆಲೆನ್ ತುಳುವರ್ ಕಲ್ತ್‌ದನೆ ಅಕ್ಲೆನ ಅಜ್ಜಿ ಕತೆಕ್ಲೆಡ್. ಇಂಚಿತ್ತಿ ಅಜ್ಜಿ ಕತೆಕ್ಲೆ, ಪಾಡ್ಡನದ ಕತೆಕ್ಲೆ ರುಚಿನ್ ನಮ್ಮ ಪೊಸ ಕಾಲದ ತುಳುವ ಚೋಕ್ಲೆಗ್ ಪುಟ್ಟವೊಡು ಪನ್ನಿ ಆಸೆ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದವು. ಅಂಚಾದ್ ಈತ್ ತುಳು ಕತೆ ಬೂಕುಲೆನ್ ತುಳು ಸಾಹಿತಿಲೆಡ ಬರೆಪಾದ್ ಕತೆಕಾಲ್‌ಗ್ ಬೋಡಾಪಿನ ಚಿತ್ರೊಲೆನ್ ಸೇರ್ಪಾದ್ ಬೂಕುಲೆ ಮೋನೆಲೆಗ್ ರಂಗ್ ಪಾಡ್ಪಾದ್ ತುಳು ಚೋಕುಲೆ ಮಟ್ಟೆಲೆಗ್ ಪಾಡೊಂದುಂಡು.

ತುಳು ಸಾಹಿತ್ಯ ಅಕಾಡೆಮಿ 1994ಟ್ ಈ ಕತೆ ಬೂಕುಲೆನ್ ಬರೆಪವುನ ಯೋಚನೆ ಮಲ್ತ್‌ದ್ ದಕ್ಷಿಣ ಕನ್ನಡ ಜಿಲ್ಲಾ ಪಂಚಾಯತ್‌ದೊಟ್ಟಿಗೆ ಸೇರ್‌ದ್ ಅಜ್ಜಿ ಮಲ್ಪುನ ಯೋಜನೆ ಇತ್ತಂಡ್. 20ಜನ ಸಾಹಿತಿಲೆಕುಲು ಅಕಾಡೆಮಿಡ್ ಸೇರ್ತ್ ಚರ್ಚೆ ಮಲ್ತ್‌ದ್ ಈ ಬೂಕುಲೆನ್ ಬರೆದ್ ಕೊರ್ಕೆರ್. ಬೇತೆ ಬೇತೆ ಕಲಾವಿದರೆಕುಲು ಈ ಬೂಕುಲ್ ಮೋನೆದ ಚಿತ್ರೊಲೆನ್ ಉಳಯಿದ ಚಿತ್ರೊಲೆನ್ ಬರೆದ್ ಕೊರ್ಕೆರ್. ಆಂಡ 1995ಟ್ ತುಳು ಸಾಹಿತ್ಯ ಅಕಾಡೆಮಿ ಅಸ್ತಿತ್ವೊಡು ಇಜ್ಜಂದಿನೆಡ್‌ದಾಲಾ, 1996ಟ್ ಅಕಾಡೆಮಿಗ್ ಪೊಸ ಜುವ ಕೊರ್ನಗ್ ಜಿಲ್ಲಾ ಪಂಚಾಯತ್‌ದ ಯೋಜನೆ ಉಂತುದು ಪೋಯಿನೆಡ್‌ದಾಲಾ ಬೊಕ್ಕ ಅಕಾಡೆಮಿದ ಪಣವುದ ಈ ಮಾತ ತಾಪತ್ರಯೊಲೆಡ್‌ದಾಲಾ ಈ 20 ಬೂಕುಲೆನ್ ಅಜ್ಜಿ ಮಲ್ಪುನ ಕೆಲಸೊ ದುಂಬು ದುಂಬೇ ಪೋಂಡು. ಆಂಡ ಇತ್ತೆ ಎಂಚಲಾ ಮನಸ್ ಮಲ್ತ್‌ದ್ ಈ ಎಡ್ಡೆ ಕೆಲಸೊನು ಕೋಡಿ ಎತ್ತವೊಡುಂದು ತುಳು ಸಾಹಿತ್ಯ ಅಕಾಡೆಮಿ ಈ 20 ಬೂಕುಲೆನ್ ಅಜ್ಜಿ ಮಲ್ಪೊಂದುಂಡು.

ಈ ಬೂಕುಲೆನ್ ಬರೆದ್ ಕೊರ್ತುನ ಮಾತ ತುಳು ಸಾಹಿತಿಲೆನ್, ಅವೆಕ್ ಚಿತ್ರ ಬರೆದ್ ಕೊರ್ತಿ ಕಲಾವಿದರೆನ್ ಅಕೆಡಾಮಿ ಮೋಕೆಡ್ ನೆನತೊಂದುಂಡು. ಉಂದೆಟ್ ಅಪ್ಪೊವಡ್ಯೆ ಕತೆ ಬೂಕುನು ಪೊರ್ಲುಡು ಮೊಡೆದ್ ಕೊರಿನ ಮುದ್ದು ಮೂಡುಬೆಳ್ಳಿ ಮೆರೆಗ್ ಅಕಾಡೆಮಿದ ಪುದರ್‌ಡ್ ಸೊಲ್ಗೆ ಸಂದಾವೊಂದುಲ್ಲೆ. ಈ ಬೂಕುಗು ಅಕ್ಷರ ವಿನ್ಯಾಸ ಮಲ್ತ್‌ದ್ ಪೊರ್ಲು ಪೊಲಿಗ್ಡೆ ಅಜ್ಜಿ ಮಲ್ತ್ ಕೊರಿನ ಆಕೃತಿ ಕಂಪ್ಯೂಟರ್‌ದ ಕಲ್ಲೂರು ನಾಗೇಶ್ ಬೊಕ್ಕ ಬಳಗದಕ್ಲೆನ ಸಹಾಯೊನು ಅಕಾಡೆಮಿ ಏಪಲಾ ನೆನತೊನುಂಡು.

ಅಪ್ಪೊದಡ್ಯ

ಅಜ್ಜಿ - ಪುಳ್ಳಿ

ಒಂಜಿ ಊರುಡುಗೇ ಒರ್ತಿ ಅಜ್ಜಿಲಾ ಪುಳ್ಳಿಲಗೆ. ಅಜ್ಜಿ ಪುಳ್ಳಿಡ ಪಂಡ್‌ಗೇ, "ಅಂದ ಮಗಾ, ಈ ಯಾಪೊಲ ಇಂಚೆನೇ ದಾನೆ ಕುಲ್ಲೊಂದಿಪ್ಪುವಾ, ಪಾತೆರಂದೆ ಮನಿಪಂದೆ ಕುಲ್ಲುತ್ತಾ, ದಾನೆ ನಿಕ್ಕ ಬೇಜಾರಾ?"

"ಏನ್ ದ್ಯಾತೆನಜ್ಜೆ ಪಾತುರನೇ, ಯಾನ್ ಯೇಪೊಲ ಇತ್ತಿಲೆಕನೆ ಉಲ್ಲೆತ್ತಾ ಇಂದ್ ಆ ಪುಳ್ಳಿ ಪಂಡಲೆ. ಅಜ್ಜಿ ಪಂಡ್‌ಗೇ, "ಏಪೊಲ ನಿನ್ನ ಮೋನೆ ತೂನಗ ಎಂಕ್ ಸಂತೋಸ್ ಆಪೇದ್‌ಂಡ್ ಮಗಾ. ನಿನ್ನ ಮೋನೆದ ಲಕ್ಷಣೊಂಜಿ ಬಾರೀ ಪೊರ್ಲುಂಡು. ಆಂಡ ಈ ಒಂಜಿ ಪಾತೆರೊನೆಂಕ್ ಪಾತೆರ್‌ಡ ಎಂಕ್ ಬಾರಿ ಸಂತೋಸಾತು. ಇತ್ತೆ ಈ ಮಣಿಪಂದೆ ಕುಳ್ಳನೆ ದಾನೆ ಬೇಜರೊಡು ಮಗಾ, ಎನಡ ಬಾಯಿ ಬುಡ್ಡು ಪನ್ನ ಮಗಾ" ಅಯಿಕ್ ಆ ಪೊಣ್ಣು ಪಂಡ್,

"ಅಜ್ಜೆ, ಎಂಕ್ ಬೇತೆ ದಾಲ ಬೇಜಾರ ಇದ್ದಿ. ಇಂದೆ ಆಯೆರೆ ತಿಕ್ಕಡೊಂಜಿ ಮಲ್ಲ ಇಲ್ಲಂಡತ್ತೆ, ಅವು ಅರಸುಲ್ಕಲೆ ಇಲ್ಲ್",

"ಅಂದ್",

"ಅಲ್ಲ ತೂಲಜ್ಜಿ, ಏತ್ ಕೋರಿಲು, ಏತ್ ಏಡ್‌ಲು! ಏತ್ ಪುಚ್ಚೆಲು, ಏತ್ ನಾಯಿಲು ಮಾತ ಉಂಡತ್ತೇ, ನಮ್ಮ ಇಲ್ಲಳ್ ಒಂಜಿ ಕೋರಿಲಾ ಇಜ್ಜತ್ತೆ ಅಜ್ಜಿ"

"ಆಹಾಂ, ಈ ಒಂಜಿ ಕೋರಿಗ್ ಬೋಡಾದ್ ಈ ಬೇಜಾರೊಡು ಕುಲ್ಲಿನ ಬಾಲೆ, ನಿಕ್ಕ ಒಂಜತ್ತ ನಾಲ್ ಕೋರಿ ಬೋಡಾಂಡಲ ಋನಾನ್ ಕೊನತ್ತ ಕೊರ್ತುವೆತ್ತಾ, ಈ ಬೇಜಾರ್‌ಡ್ ಕುಲ್ಲೊಡ್ಡಿ, ಯಾನ್ ಕೊಂಡತ್ತ ಕೊರ್ಪೆ" ಇಂದ್ ಅಜ್ಜಿ ಸಮಧಾನ ಪಂಡ್.

ಮನದಾನಿ ಕಾಂಡೆ, ಅಜ್ಜಿ ಲಕೊಂದ್ ಪಿದಾಡ್‌ದ್ ಅರಮನೆಗ್ ಪೋಂಡು. ಅಲ್ಪ ಅರಸುಳೆನ್ ತೂದು ಅಜ್ಜಿ, ಅರಸುಲೇ, ಅರಸುಲೇ ಇಂದ್ ಲೆತ್ತಂಡ್.

ಅರಸುಲು ಪರಬುನು ತೂದು ಪಣ್ಣೆರ್, "ಆಹಾ ದಾನೆ ಬತ್ತಾ ಅಜ್ಜೀ, ಇಂದಾ ಈ ವೊಟ್ಟು ಬಡ್ತರೆ ಬಲ್ಲಿ, ಪಿದಾಯಿ ಉಂತುಲಾ" ಪಂಡೆರ್. ಸೀದಾ ಉಳಾಯಿ ಪೋಯೆರ್. ಅಪಗ "ಅಂದಪ್ಪಾ ನಿಕುಲು ಮಲ್ಲಕುಲು, ಯಾನ್ ಪಾಪದಾಳ್. ದಾಯೆ ಪಿದಯಿ ಪೋಯರೆ ಪಣ್ಣೆರ್? ಆವು ಅರಸುಲೇ, ಯಾನ್ ಪಾಪದಾಲ್, ವೊಟ್ಟು ಬಡ್ತುಜಿ, ಪಿದಾಯಿ ಉಂತುದೆ" ಇಂದ್ ಪೋದು ಮುಟ್ಟುಡು ಉಂತುವಲ್.

ಆತಾನಗ ಅಲ್ಪ ಅರಸುಲ್ಲ ಬುಡೆದಿ ರಾಣಿ ಅಬ್ಬೆ ಉಲಯಿಡ್ ಬತ್ತೆರ್. ಆರ್ ಈ ಅಜ್ಜಿನ್ ತೂಯೆರ್. ಅಜ್ಜಿನ ಬೊಳ್ಳು ಬೊಳ್ಳು ತರೆ ಕುಜಲ್ ಪೂರ ಕೆಂಚಿ ಆವೊಂದು ಬತ್ತತ್ತಂಡ್. ಜೂವ ಕುಂಬರೊಂದಿತ್ತಂಡ್. ರಾಣಿ ಅಬ್ಬೆಗ್ ತೂದು ಬೇಜಾರ್ ತೋಜಿಂಡ್.

ಆರ್ ಕೇಂಡೆರ್, "ದಾನಿ ಅಜ್ಜೀ ಈರೆಗ್ ನಡಪೆರೆ ತೀರುಜತ್ತಾ, ಈರ್ ಇಡೆಗ್ ದಾಯೆ ಬತ್ತರ್?"

ಅಪಗ ಅಜ್ಜಿ ಪಂಡ್, "ರಾಣ್ಯಮ್ಮಾ, ಎನ್ನ ಪುಲ್ಲಿ ಒರ್ತಿ ನಮನವುಲು ಒಂಜಿ ಕೋರಿಲಾ ಇದ್ದಿ. ಅರಸುಲ್ಲವುಲು ಮಸ್ತ್ ಕೋರ್ಲ್ಲ, ಒಂಜಿ ಕೇನ್ ಪತೊಂಬಲೆ ಇಂದ್ ಪಂಡಲ್, ಅಂಚ ಯಾನಿಡೇ ಬತ್ತನೇ" ಇಂದ್ ಪಂಡಲ್.

"ಆಹಾಂ, ದಾನೆಯಾ, ಈತ್ ಮಲ್ಲ ಅರಮನೆಗ್ ಈ ನಿನ್ನ ಪುಲ್ಲಿ ಪಂಡಲ್‌ಂದ್ ಪರಬು ತೊಂಡಿ ಈ ಕೋರಿ ಕೇನ್ಯೆರೆ ಬತ್ತನಾ, ನಿನ್ನ ಪುಲ್ಲಿಗ್ ದಾನೆ ಕೋರಿ ಎಂಕ್‌ಲ್ಲ ಮೂತ್ರ ತೋಜಿನಾ, ನಡಪು ಮುಲ್ಲು" ಪಂಡ್ ರಾಣಿಯಬ್ಬೆ ಪರಬುಗು ಸಮಾ ನೆರ್ದ್ ಕಡಪುಡ್‌ಂಡ್.

ಅಜ್ಜಿ ಕಣನೀರ್ ಪಾಡೊಂದು ಇಲ್ಲಡೆ ಪಿರ ಬತ್ತಂಡ್. ಪುಳ್ಳಿ ಕೇಂಡೊಲು, "ದಾನೆ ಆಂಡಜ್ಜೀ?"

ಅಜ್ಜಿ ಪಂಡೊಲು, "ಇಂದಾ ಮಗಾ, ನಿನ್ನ ಒಂಜಿ ಕೋರಿದ ಆಸೆಗ್ ಯಾನ್ ಅರಮನೆಗ್ ಪೋದು ಕೇಂಡೆ ಅಲ್ಪ ಅರಸುಲು, ಅರಸುಲ್ಲ ಬುಡೆದಿ ಎಂಕ್ ಬೋಡ್ತೊಂದಿನ ದಾನೆ ಮಾತ ಪಾತೆರ ನೆರ್ದ್ ಕಡಪುಡ್ಯೆರ್" ಎನ್ನೊಂದು ಬುಲಿತೊಲು.

ಪುಳ್ಳಿ ಅಜ್ಜಿಡ "ಮಲ್ಲೆತ್ತ್ ಅಜ್ಜಿ, ಅರಸುಲ್ಲ ಇಲ್ಲಡ್ ನಂಕ್ ಕೋರಿ ಕೊರ್ಚೆರತ್ತಾ, ಬೊಡ್ಡಿ. ನಂಕ್ ಬಡವೆರ್ ಇಲ್ಲಾಳ್ ಕೋರಿ ತಿಕ್ಕುತೂಕಾ, ಈ ಕುಲ್ಲುಲ ಅಜ್ಜಿ" ಇಂದ್

ಅಜ್ಜಿಗ್ ಸಮಾಧಾನ ಪಂಡೊಲು.

ಪುಳ್ಳಿ ಕೋರಿ ನಾಡೊಂದು ತಾನೇ ಪಿದಾಡೊಲು. ಪೋನಗ ಮೊಕುಲೆಡ್‌ದಾಲಾ ಬಾರೀ ಬಡಪತ್ತ್ ಇತ್ತಿನ ಒಂಜಿ ಇಲ್ಲಾ ತೋಜಿಂಡ್. ಅಲ್ಪ ಒಂಜತ್ತ್ ನಾಲ್ ಪೆರಡೆ ಲಾಕಿಲು ಜಾಲ್‌ಡ್ ಅರಿ ಕೊಡತ್ತೊಂದು ತಿನೋಂದುಲ್ಲ. ಎಂಕೊಂಜಿ ಕೋರಿ ಬೋಡತ್ತೇ ಕೊರ್ಪರಾ? ಇಂದ್ ಪೊಣ್ಣು ಕೇಣ್ಣಳ್. ಅಕುಲು ನಿಕ್ಕ್ ಒವು ಬೋಡಾ ಆಯಿನ್ ಕೊಂಡ್ ಪೋಲಾ ಪನ್ನೆರ್. ಪುಳ್ಳಿ ಒಂಜಿ ಸೋಕುದ ಪೆರಡೆ ಲಾಕಿನ್ ತೂದು ಅವೆನ್ ಕೈಟ್ ಪತ್ತೊಂದು ಇಲ್ಲಡೆ ಬತ್ತೊಲು. ಅಜ್ಜಿಲಾ, ಪುಳ್ಳಿಲಾ ಬಾರೀ ಸಂತೋಸುಡು ಆ ಪೆರಡ್ಲಾಕಿನ್ ಸಾಂಕ್‌ದ್ ಮಲ್ಲೆ ಮಲ್ಲೆರ್.

ಮಲ್ಲೆ ಆಯಿನ ಪೆರಡೆ ಒಂಜಿ ದಿನ ಕೆತ್ತಿ ದೀಯರೆ ಸುರು ಮನ್ತಂಡ್. ಅವೆನ್ ತೂಯಿನ ಪುಳ್ಳಿ ಕುಸಿಟ್ ಅಜ್ಜಿನ ಕೈತಾಲ್ ಪಾರ್ ಬತ್ತದ್ ಪಂಡೊಲು,

"ಅಜ್ಜಿ, ಅಜ್ಜಿ, ನಮ ಪೆರಡೆ ಇನಿ ಕೆತ್ತಿ ದೀತ್‌ಂಡ್"

ಅಜ್ಜಿಗ್‌ಲ ಪುಲ್ಲಿಗ್ಲಾ ಬಾರೀ ಸಂತೋಸಾಂಡ್.

"ಈ ಕೆತ್ತಿನ್ ದಾದ ಮಲ್ಲೊಡಜ್ಜಿ?" ಇಂದ್ ಕೇಂಡೊಲು ಪುಳ್ಳಿ.

ಅಜ್ಜಿ ಪಂಡೊಲು "ಮಗಾ, ಒಂಜಿ ಕರಕ್ ಸೋಕ್‌ಡೊಂಜಿ ಮಜಿತ್ತ ಗೀಟ್ ಒಯ್ತದ್ ಅತ ಉಲಾಯಿ ಆ ಕೆತ್ತಿನ್ ದೀಲ".

ಅಂಚೆನೇ ಒಂಜಿ ಪತ್ತದಿನ ಅನಗ ಪತ್ತ ಕೆತ್ತಿ ಆಂಡ್.

"ಅಂಚಾಂಡ, ನಮ ಒಂಜಿ ಮೂಲೆಡ್ ಒಂಜಿ ಕಾಪು ಕಟ್‌ದ್ ಬುಡ್ಡು" ಇಂದ್ ಒಂಜಿ ಕಾಂಟ್ಯಡ್ ಒಂತೆ ಬೈ, ಮುಳಿ ಮಾಂತ ಪಾಡ್, ಕಾಪುಡ್ ಕೆತ್ತಿ ದೀದ್, ಪೆರಡೆನ್ ಕುಲ್ಲಾಯೆರ್.

ಪೆರಡೆನ್ ಕಾಪುಡು ಕುಲ್ಲಾದ್ ತಿಂಗೊಲಾಂಡ್. ತಿಂಗೊಲಾನಗ ಅವು ಕಿನ್ನಿಲಾಯ. ಪುಳ್ಳಿ ಅವೆನ್ ತೂದು ಅಜ್ಜಿಡ "ಈ ಕೋರ್ಲೆನ್ ದಾನೆ ಮಳ್ಳುನಜ್ಜಿ?" ಇಂದ್ ಕೇಂಡೊಲು.

ಅಜ್ಜಿ ಐಕ್, "ಅಪಂಡ ನಮ ಈ ತುಳುನಾಡ್‌ಡ್ ಪುಟುದು ಮಗಾ, ತುಳುವೆರಾದ್ ನಮ, ಯಾನ್ ಪ್ರಾಯ ಪೋಂಡಲಾ, ಈ ಎಲ್ಯ ಪ್ರಾಯದಾಲ್, ನಿಕ್ ತೆರಿಯೊಡು. ನಂಕ್ ಕೆಲವು ಮಾತ ತುಳುತ ರಿವಾಜಿಲು ಉಲ್ಲ. ಹೆರಿಯೆರೆ ಇಲ್ಲಾಡ್ ದೈವ, ದೇವೆರೆಗ್ ಬೂತ ಕುಲೆಕ್ಲೆಗ್ ಕೋರಿ ಜುವಾದಿ ಮಾತೆರೆಗ್ಲಾ ಬೋಡಾಪುಂಡು. ಐಕಾತ್ರ ಈ ಕೋರ್ಲೆನ್ ಮಾತ ದೈವೊಲೆಗ್ ಕೊರಿಯೆರೆಂದ್ ದೀಕ"



ಅಪಗ ಪುಳ್ಳಿಗ್ ದ್ಯಾತನೋ ಬೇಜಾರಾಪುಂಡು "ಅಂದೆ ಅಜ್ಜಿ, ಈ ಕೋರ್ದೆನ್ ನಮು ಏರೆಗಾಂಟ್ಲಾ ಮಾದ್ ಅಯಿನ ಕಾಸ್ಡ್ ಎಂಕೊಂಜಿ ಅಂಗಿ, ಈರೆಗೊಂಜಿ ಸೀರೆ ದೆತೊನ್ನ ಅಜ್ಜಿ. ಬುಕ್ಕ ಎಂಕ್ ಸಾಲೆಗ್ ಪೋವೊಡತ್ತೆ. ಅಪಗ ಸಾಲೆದ ಬೂಕು ದೆತೊನಿಯೆರೆ ಕಾಸ್ ಮಾಂತ ಒಟ್ಟು ಮಲ್ತ್ ದೀಯೊಡತ್ತೆ ಅಜ್ಜಿ?" ಇಂದ್ ಪುಳ್ಳಿ ಎತೆ ಪಾತೆರಿಯೊಲು.

"ಅಂಚನ ಬಾಲೆ, ಆಂಡ ದೈಯ ದೇವೆರೆಗ್ ಕೊರಂದೆ ನಮು ಮಾಂತೆನ್ನಾ ಮಾದ್ ತಿನಿಯೆರೆ ಆವಾ? ಅಂಚಾಂಡ ದೈವ ಮುನ್ಯಂದಾ ಮಗಾ!" ಇಂದೊಲು ಅಜ್ಜಿ.

ಪುಳ್ಳಿಗ್ ಒಂಜಿ ಆಳಚನೆ ಬತ್ತಂಡ್.

"ಅಜ್ಜಿ ಅಜ್ಜಿ!"

"ದಾನೆ ಮಗಾ?"

"ನಮು ದೈಯವೊಲೆಗ್ ಒಂಜಿ ಕೋರಿ ದೀಕಾ. ನನೋಂಜಿ ಪೆರಡೆನ್ ಕೆತ್ತಿಗ್ ದೀಕ. ಅಪಗ ಪಿರ ಕೆತ್ತಿಡ್ ಕಿನ್ನಿಲು ಆಪ ಅತ್ತೇ? ಬಾಕಿದ ಎಣ್ಮ ಕೋರ್ದೆನ್ ಮಾರ್ಡ್ ನಂಕ್ ಬೋಡಾಪಿ ಸೊತ್ತುಲೆನ್ ಕೇಣ್ಡ್ ಬರ್ಕಾ ಆವೇ ಅಜ್ಜಿ?"

ಅಜ್ಜಿಗ್ ಸಂತೋಸಾಂಡ್. "ಈ ಎಡ್ಡೆ ಬಿಸೆದಿ ಬಾಲೆ. ಅಂಚೆನೇ ಮಾಣ್ಪುಗ. ಅರಸುಲ್ ನೆರಡೆ ಕೇಂಡ್‌ದಾಂಡ್, ಬಡವೆರ್ ಇಲ್ಲಾಡ್ ನಟ್‌ದ್ ಕಂತೆದ್ ಈ ಕೋರಿ ತಾಂಕಿಯಾಂಡ್ಲಾ, ಈತ್ ಕೋರ್ದೆನ್ ಮಲ್ತ್‌ದ್ ಕಾಸ್ ತಿಕ್ಕುನ ತಾದಿ ನಾಡ್ಯನೇ ಮಗಾ, ಆವಡ್, ಈ ಪಂಡಿಲೆಕನೇ ಆವಡ್"

ಈತ್ ಪಣ್ಣ ಅಜ್ಜಿ ಬತ್ತಿನಕಲೆಡ ಮಾತ, "ಎಂಕ್ಲೆನಮ್ಮ ಮಾರುನ ಕೋರಿ ಉಂಡು, ಬೋಡೇ?" ಇಂದ್ ಕೇನೊಂದಿತ್ತಂಡ್. ಅಂಚ ಎಣ್ಮ ಕೋರ್ಲು ಮಾದ್ ಪೋಯ. ಅಕ್ಲೆಗ್ ಎಡ್ಡೆ ಕಾಸಾಲಾ ತಿಕ್ಂಡ್. ಹಿರಿಯಾಕ್ಲೆನ ಇಲ್ಲಡ್ ದೈಯೊಲೆನ ಕೆಲಸ ಆಪಿ ಪೊರ್ತುಗು, ಅವೆಕ್‌ಂದ್ ದೀತಿನ ಕೋರಿನ್ ಕೊರೈರ್. ಎಡ್ಡೆ ಗಡ್ಡ್ ಸಮ್ಮನದ ಒಣ್ಣ್ ಆಂಡ್. ಒರಿದಿನ ಒಂಜಿ ಪೆರಡೆ ಕುಡ ಕೆತ್ತಿ ದೀದ್ ಪಾರೊಡು ಕುಲ್ಲುದು ಕಿನ್ನಿ ಉಡೆತೊಂದುಂಡು.

○ ಕತೆ ಪಂಡಿನಾರ್ : ಶ್ರೀಮತಿ ಕಮಲ, ಕೇಪು, ಬಂಟ್ವಾಳ

ತಿದ್ಯಪ್ಪೆ ಮಗ

ಬಾರೀ ಮಲ್ಲ ಒಂಜಿ ಕಾಡ್. ಆ ಕಾಡ್‌ದ ನಡುಟೊಂಜಿ ನೇಲ ಗೋಲ್ಲ ಮರ. ಆ ಮರತ ಮಿತ್ತ್ ರಡ್ಡ್ ಆಣ್-ಪೊಣ್ಣು ಕೇಂಜವ ಪಕ್ಕಿಲು ಗೂಡು ಕಟೊಂದು ದಿನ ಕಲೆಯೊಂದಿತ್ತ.

ಪೊಣ್ಣು ಕೇಂಜವ ಪಕ್ಕಿ ದಿನಾಲ ತೆತ್ತಿ ದೀವೊಂದಿತ್ತ್ಂಡ್. ಅಯ್ ಬೊಕ್ಕ ಆ ಪಕ್ಕಿಲು ತಿನರೆ ಪತೊಂಬರೆಗ್ ಒಡೆಗಾಂಡಲ ನಾಡೊಂದು ಪೋವೊಂದಿತ್ತ. ಪೋದು ಬನ್ನಗ ದಿನೋಲ ಅಕಲ್ ತೆತ್ತಿ ಉಪ್ಪುಜಿ.

ಆ ಗೋಲಿದ ಮರತ ಮುದೇಲ್ ಒಂಜಿ ಮಲ್ಲ ಉಚ್ಚು ಕಾಲಿಂಗ್ ಉಪ್ಪೇದ್‌ಂಡ್. ಅವು ದಿನಾಲ ಮರಕ್ಕ್ ಮಿತ್ತ್ ಪೋದು ಪಕ್ಕಿದ ತೆತ್ತಿ ತಿಂದ್ ಬರೊಂದಿತ್ತ್ಂಡ್. ಏಪಲಾ ಇಂಚೆನೇ ಆವೊಂದಿತ್ತ್ಂಡ್. ಆ ಪಕ್ಕಿಲೆಗ್ ಬಾರೀ ಎತೆ, "ಎಂಕಲೆ ತೆತ್ತಿ ಒರಿಯೂಜೇ, ಎಂಕಲೆಗ್ ಜೋಕುಲು ಪುಟುಜನೇ" ಇಂಚ ಬಾರೀ ಸೋಕ ಬುಡೊಂದಿತ್ತ.

ಆನಿಲಾ ಇಂಚೆನೇ ಏಪದಲ್ಕನೇ ಪೊಣ್ಣು ಕೇಂಜವೆದಿ ತೆತ್ತಿ ದೀಂಡ್. ಆಣ್ - ಪೊಣ್ಣು ಇನೆ ಆದ್ ತಿನರೆ ನಾಡೊಂದು ಪೋಯ. ಆತೊರ್ತುಗು ಗೋಲ್ಲ ಮರತ ಮುದೇಲ್‌ಗ್ ಒರಿ ಆಣ್ ಬರ್ಪೆ.

ಕಾಡ್‌ದ ಆಪೆಲ್ ಇಲ್ಲ್ ಇತ್ತ್ಂಡ್. ಆಯೆ ಅಪ್ಪೆ ದಾಂತಿ ಬಾಲೆ. ಆಯನ ತಿದ್ಪಪ್ಪೆ ಆಯಗ್ ಬಂಜಿಗ್ ದಾಲಾ ಕೊರೊಂದಿತ್ತ್‌ಜೊಲು. ಕಂಡನ್ಯೆ ಬೆಂದ್ ಕಂತಿನನ್ ಮಾತ ತನ ಸೊಂತ ಜೋಕುಲೆಗೇ ಬೆಯ್ಪಾದ್ ಪಾಡೊಂದಿತ್ತೊಲು. ಈ ಆಣನ್ ಉಪಾಸನೇ ಪಾಡೊಂದಿತ್ತೊಲು. ಆಯೆ ಮಲ್ಲೆ ಆಯೆ. ಒಂಜಿ ದಿನ ತಿದ್ಪಪ್ಪೆ ಆಯನ್, "ಇಂದಾ, ಈ ಪೋದು ಎನ ಬಾಲೆಗ್ ಒಲ್ತಾಂಡ ಪಿಲಿತ ಪೇರ್ ಪತೊಂಬಲ. ಬಜಿ ಕೈಟ್ ಪಿರ ಬತ್ತಡ ಇಲ್ಲ್ ಪೊಗ್ಗರೆ ಬುಡಯೆ" ಇಂದ್ ಆಯನ್ ಪಿದಯಿ ಪಾಡ್ಪೊಲು. ಅಂಚ ಆಯೆ ಬೇಜಾರ್‌ಡ್ ಲಕೊಂದು ಈ ಗೋಲ್ಲ ಮರತ ಮುದೇಲ್‌ಗ್ ಬತ್ತಿತ್ತೆ.

ಆಣ್ ಅಲ್ಪನೆ ಕುಲೊಂದುಪ್ಪುನಗ ಕಾಲಿಂಗ್ ಮರತ ಒಟ್ಟೆದುಲಯಿಡ್ ಪಿದಯಿ ಬತ್ತದ್ ಸರಸರಂದ್ ಮರತ ಮಿತ್ತ್ ಪೋಂಡು. ಆಯೆ ಅವು ಓಡೆಗ್ ಪೋಪುಂಡುಂದ್ ತೂವೊಂದು ಕುಲ್ಲಿಯೆ. ಕಾಲಿಂಗ್ ಮಿತ್ತ್ ಪೋದು ಪಕ್ಕಿದ ಗೂಡುಗು ಬಾಯಿ ಪಾಡ್

ತೆತ್ತಿನ್ ಒಯ್ ತಿಂದಾಂಡ್.

ಒಂತೆ ಪೂರ್ತಾನಗ ಕೇಂಜವ ಪಕ್ಕಿಲು ಬತ್ತ, ಗೂಡುಡು ತೆತ್ತಿ ದಾಂತಿನ ತೂದು ಅಯ್ಯೊ ಇಂದ್ ಮುರೆಡೊಂದು ಕುಲ್ಲಿಯ. ಅವೆನ್ ತೂದು ಆಣ್ ಬೇಜಾರ್ ಆಂಡ್.

ಮನದಾನಿಲಾ ಪಕ್ಕಿ ತೆತ್ತಿ ದೀಂಡ್. ಬೊಕ್ಕ ಅಯ್ಯುಲು ತಿನರೆ ಪತೊಂಬರೆ ರಾವೊಂದು ಪೋಯ. ಆತಾನಗ ಕಾಲಿಂಗೆ ಮರತ ಮಾಟೆಡ್ ಪಿದಾಯಿ ಬತ್ತಂಡ್. ಅದಗ ಆಣ್ ಮರತ ಮುದೇಲ್ ಬಿಜಿಕ್ರೆ ಒಟ್ಟು ಮಲ್ತಾದ್ ಅಗುಡೆ ಪಾಡ್ಯೆ. ಅಯ್ ತೂ ಮಿತ್ತ್ ಲಕ್ಂಡ್. ಕಾಲಿಂಗೆ ಪಿದಯೆ ಬತ್ತಾದ್ ಮರಕ್ಕ ಮಿತರೆ ತೂನಗ ಅಯ್ ದಂಬು ಕಟ್ತಾದ್ ಅವು ತೂಕು ಬೂರ್ದು ಸೈತ್ಂಡ್. ಆನಿ ಗೂಡುದ ತೆತ್ತಿ ಒರಿಂಡ್.

ಬಯ್ಯಾನಗ ಕೇಂಜವ ಪಕ್ಕಿಲು ಕೋಕಯಿಲೆಡ್ ತಿನರೆ ಪತೊಂದು ಗೂಡುಗು ಬತ್ತ. ಇನಿ ತೆತ್ತಿ ಅಂಚೆನೆ ಇತ್ತಿನೆನ್ ತೂದು ಅಕಲೆಗ್ ಬಾರೀ ಸಂತೋಸಾಂಡ್. "ಏರಪ್ಪಾ ಎಂಕಲ್ಲ ಈ ತೆತ್ತಿನ್ ಒರ್ತಿನಿ?" ಇಂದ್ ಅಂಚಿಂಚಿ ತೂನಗ ಆಣ್ ದೂರೊಡು ಕುಲೊಂದಿತ್ತೆ.

"ಎಂಕಲ್ಲ ತೆತ್ತಿ ಇನಿ ಒರಿಂಡ್. ಏರಪ್ಪಾ ಉಂದೆನ್ ಒರ್ತಿನಿ?" ಇಂದ್ ಕೇಂಜವನಕುಲು ಕೇಂಡ್.

ಆಯೆ ಪಂಡೆ, "ಕೋಡೆ ನಿಕುಲು ಬುಲಿಪುನೆನ್ ತೂಯೆ. ಇನಿ ಕಾಲಿಂಗೆ ಮಿತ್ತ್ ಮಿತ್ತರ್ನಗ ಯಾನ್ ತಿರ್ತ ತೂಪಾಡ್ಯೆ. ಅವು ಅಯ್ ಬೂರ್ದು ಸೈತ್ಂಡ್. ನನ ನಿಕಲೆಗ್ ಪೋಡಿಗ್ ಇಜ್ಜಿ" ಇಂದ್ ಪಣ್ಣೆ.

"ಅಂದಾ, ಏರಪ್ಪಾ ಈ ಪುಣ್ಯಾತ್ತೆ! ಎಂಕಲ್ಲ ಸಂತಾನೊನು ಒರ್ತತ್ತಾ, ನಿಕ್ಕ್ ಪುಂಞ ಬರಡ್. ಏರ್ ಯೀ?" ಇಂದ್ ಕೊಂಡಾಟೊಡು ಕೇನುವ. ಆಯೆ ತನ ಕತೆನ್ ಮಾತ ಪನ್ನೆ. ಪಕ್ಕಿಲು ಆಯಗ್ ಪರ್ಂದ್ ಮಾತ ತಿನರೆ ಕೊರ್ಪೊ.

"ಅಂಚಾಂಡ, ದುಂಬು ಪೋಲ, ನಿನ ಕಷ್ಟ ಕಾಲೊಡು ಎಂಕಲೆನ್ ನಿನೆಪು ಮಲ್ಪುಲ. ಎಂಕುಲು ಬತ್ತಾದ್ ನಿಕ್ಕ್ ಸಾಯ ಮಲ್ಪುವ" ಇಂದ್ ಪನ್ನೆ. ಆಯೆ ಪಿಲಿತ ಪೇರ್ ಕೊನರೆಂದ್ ದುಂಬು ದುಂಬು ಪೋಪೆ.

ಕತ್ತಲೆ ಆವನಗ ಒಂಚಿ ಪಿಲಿತ ಮಾಟೆ ತಿಕ್ಕೊಂಡು. ಆಯೆ ಅಯ್ ಉಲಯಿ ಪೋಪೆ. ಒಂಚಿ ಪೊಣ್ಣು ಪಿಲಿ ತನ ಕಿಂಞಗ್ ಮಿರೆ ಪೇರ್ ಕೊರೊಂದಿತ್ತಂಡ್. ಉಂಚೆ ಅಯ್ ಕಯ್ಲ ಪೋದು "ಪಿಲಿಯೇ ಪಿಲಿಯೇ, ಎನ ತಿದ್ಯಪ್ಪೆನ ಬಾಲೆಗೊಂತೆ ನಿನ್ನ ಪೇರ್

ಬೋಡು ಕೊರ್ಪನಾ?" ಇಂದ್ ಕೇನ್ನೆ.

ಆಯನ್ ತೂಕಿನೇ ಪಿಲಿ ಲಕ್ದ್ ಉಂತುದು ಗುರುಂ ಪಾಡೊಂಡು, ಪನ್ನಂಂಡು, "ನಿಕ್ಕ ಪೇರ್ ಬೋಡಾ, ಎನ್ನ ಕಂಡನ್ಯನ್ ಒರಿ ಮಾಟ ಮಂತ್ರದಾಯೆ ಮಂತ್ರ ಮಲ್ತಾದ್ ಪತೊಂಪೋದ್ ಪಾಂಜರೊಡು ಪಾಡ್ ದೀವೊಂದೆ. ಅವೆನ್ ಎಂಕ್ ಕೊನತ್ ಕೊರ್ಯಡ ನಿಕ್ಕ ಯಾನ್ ಪೇರ್ ಕೊರ್ವೆ. ಇಜಿಂಡ ಇಂದಾ ನಿನನಿತ್ತೆ ತಿನ್ನೆ" ಪನ್ನಂಂಡು.

ಆಯೆ ಅಯ್ಕ್ "ಪಿಲಿಯೇ ಪಿಲಿಯೇ ಎನನ್ ತಿನೊಡ್ಚಿ. ಯಾನ್ ನಿನ ಕಂಡಾನ್ಯನ್ ಬುಡ್ಪಾವೊಂದು ಬರ್ಪೆ. ಅಯಿಡ್ ಬೊಕ್ಕ ಎಂಕ್ ಪೇರ್ ಕೊರ್ಲಾ" ಇನೊಂದು ಕೈ ಮುಗ್ಗಿವೆ. ಪಿಲಿ ಆವೊನ್ನಂಂಡು.

ಅಲ್ತಡ್ ಉಂಬೆ ಪಿದಾಡುವೆ. ಆಂಡ ಆ ಮಾಟ ಮಂತ್ರದಾಯೆ ಓಲುಲ್ಲೆಂದ್ ಏರೆಗ್ ಗೊತ್ತುಂಡು? ಇತ್ತೆ ಯಾನ್ ದಾದ ಮಲ್ಪುನೇ ಇನೊಂದು ಇಂಚ ಎನ್ನಿನ ಆಯೆ ಕೇಂಜವ ಪಕ್ಕಿಲೆನ ನಿನೆಪು ಗೆಪ್ಪುವೆ. ಅದಗ ಆ ಕೇಂಜವ ಪಕ್ಕಿಲು ರಾವೊಂದು ಬರ್ಪೆ. "ದಾನಿ ಆವೊಡು ನಿಕ್ಕ?" ಇಂದ್ ಕೇನುವೆ.

ಆಯೆ ಪಿಲಿ ಪಂಡಿನೆನ್ ಪಕ್ಕಿಲೆಗ್ ಪನ್ನೆ.

"ಅಂದಾ, ಆ ಮಾಟ ಮಂತ್ರದಾಯೆ ಈ ಕಾಡ್ ಬಡಕಯಿ ಮೆಯಿಟ್ ಒಂಜಿ ಕಲ್ಲದ ಮಾಟದ ಉಲಯಿ ಉಲ್ಲೆ. ಬಲ ನಿನನ್ ಎಂಕುಲು ಅಡೆಗ್ ಕೊನ್ನ ಬುಡ್ಚ" ಇಂದ್ ಅಯ್ಕುಲು ರೆಂಕೆ ರೆಂಕೆ ಗೋಡ್ಯಾದ್ ಆಯನ್ ಬೆರಿತ್ತ ಮಿತ್ತ್ ಕುಲ್ಲಾವೊಂದು ರಾವೊಂದು ಪೋಯೆ. ಮಂತ್ರದಾಯನ ಮಾಟದ ಕಡಿಕ್ ಕೊನೊದು ಆಯನ್ ಜಪುಡಾಯೆ. ಅಯ್ಕುಲು ರಾವೊಂದು ಪಿರ ಪೋಯೆ.

ಆಯೆ ಮಾಟದ ಉಲಯಿ ಪೊಗ್ಗುವೆ. ಅಯ್ಕು ಉಲಯಿ ಪದಿನಾಲ್ ಅಂತರದ ಇಲ್ಲ ಇತ್ತಂಡ್. ಪದ್ದಾಲ್ ಅಂತರೊಡು ಪದ್ದಾಲ್ ಜನ ಪೊಣ್ಣುಲು ಬುಲಿತೊಂದು ಇತ್ತೆರ್. ಅಕಲ್ಲ ಕೈಯ ಕೈಯ ಕಟ್ಡ್ ಪಾಡ್‌ದಿತ್ತಂಡ್.

ಉಂಬೆ ಅಕಲ್ಲ ಕೈತಲ್ ಪೋದು, "ನಿಕುಲು ದಾಯೆಗ್ ಬುಲಿಪುನು, ನಿಕಲೆನ್ ಕಟ್ಡ್ ಪಾಡ್‌ನಿ ಏರ್?" ಇಂದ್ ಕೇನುವೆ.

ಅಯ್ಕ್ ಒರ್ತಿ ಪಣ್ಣೊಲು, "ಎಂಕುಲು ಅರಸುಲ್ಲ ಬಾಲೆಲು. ಈ ಮಾಟ ಮಂತ್ರದಾಯೆ ಎಂಕಲೆನ್ ಒರ್ಯೊರ್ಯನೇ ಕಂತ್ಡ್ ಕಟ್ಡ್ ಪಾಡ್. ಎಲ್ಲೆ ಮಾಂಕಾಲಿಗ್ ಪೊಜೆ ಸುರು

ಮಲ್ತಾದ್ ಬೊಕ್ಕ ದಿನೊಕ್ಕೊರ್ತಿನ ತರೆ ಕಡ್ತಾದ್ ಮಾಂಕಾಲಿಗ್ ಬಲಿ ಕೊರ್ಪೆಗೆ. ಬೊಕ್ಕ ಪಿಲಿತ ಬೆರಿಟ್ ಕುಲೊಂದು ಮಿತ್ತ ಲೋಕೊಗು ಆಯಗ್ ಪೋವರೆ ಆಪುಂಡುಗೆ. ಅಯ್ಯಾಂದ್ ಒಂಜಿ ಪಿಲಿನ್ನಾ ಮಾಜ ಮಲ್ತಾ ಕಂತಾದ್ ಆಪೆದ ಕೋಣೆಡ್ ಪಾಂಜರೊಡು ಪಾಡ್ಡೆ" ಇನ್ನೆರ್. ಆಯೆ ಅಂಚಿ ತೂನಗ ಪಾಂಜರದುಲಯಿ ಪಿಲಿ ಕಣನೀರ್ ಪಾಡೊಂದು ಇತ್ತಂಡ್.

"ಆ ಮಾಟ ಮಂತ್ರದಾಯೆ ಇತೆ ಓಲ್ಲೆ?" ಇಂದ್ ಕೇನ್ನೆ.

"ಇತ್ತೆ ಆಯೆ ಪೂಜ ಮಲ್ಪರೆ ಸನ್ನಯ ಪತೊಂಬರೆ ಪೇಂಟೆಗ್ ಪೋತೆ. ಆಯನ್ ಎರ್ದಾ ಕೆರೆ ಆಪುಜಿಗ್. ಆಯನ ಪ್ರಾಣ ಏಲ್ ಕಡಲ್ ಆಪೆಲ್ ಒಂಜಿ ಕಿರೆಟುಪ್ಪುನ ಕಪ್ಪೆದ ಬಂಜಿಡ್ ಉಂಡುಗೆ. ಆ ಕಪ್ಪೆನ್ ಪತ್ದಾ ಕೆಂಡ್ ಮಾತ್ರ ಈ ಮಾಟ ಮಂತ್ರದಾಯನ್ ಕೆರೆ ಆಪಿನಿ. ಅಂಚಾದ್ ಎಂಕಲೆನ್ ಏರ್ಲಾ ಬಚಾವು ಮಲ್ಪರೆ ಆಪುಜಿ" ಇಂದ್ ಅಕುಲು ಮಾತಾ ಬುಲಿಪುವೆರ್.

"ಬುಲಿಪಡೆ. ಯಾನ್ ಎಂಚಿನಾಂಡಲ ಒಂಜಿ ತಾದಿ ನಾಡ್ ಪತ್ತುವೆ" ಇಂದ್ ಆಯೆ ದೈರ ಪಣ್ಣೆ.

"ಅಪಂಡ, ಆ ಕಪ್ಪೆನ್ ಒರಿ ರಕ್ಕಸೆ ಕಾತೊಂದುಪ್ಪುವೆಗೆ. ಓ ಅಲ್ಪ ಗೋಡೆಡ್ ಒಂಜಿ ಅಂಗಿ ಉಂಡತ್ತಾ? ಅವೆನ್ ಪಾಡೊಂಡ ಏರೆಗಲ ತೋಜಂದಿಲೆಕ ಈ ಓಡಲಾ ಪೋವರೆ ಆಪುಂಡು. ಅವೆನ್ ಪತೊನು" ಇಂದ್ ಒರ್ತಿ ಪಣ್ಣೊಲು.

ಆಯೆ ಆ ಅಂಗಿನ್ ಕೈಟ್ ಪತೊಂದು ಪಿದಾಡುವೆ. ಪೋದು ಪೋದು ಕಡಲ ಬರಿಕ್ ಪೋಪೆ. ಅಲ್ಪ ಉಸೊಂದು ಕಣ್ಣ್ ಮುಚೊಂದು ಕೇಂಜವ ಪಕ್ಕಿಲೆನ್ ನೆನೆಪುವೆ. ಅದಗ ಆ ಕೇಂಜವ ಪಕ್ಕಿಲು ಬರ್ಪ. "ನಿಕ್ಕಾ ಎಂಕಲೆಡ್ ದಾದಾವೊಡು?" ಇಂದ್ ಕೇನುವ.

"ಎಂಕ್ ಏಲ್ ಕಡಲ್ ಆಪೆಲ್ ಪೋವೊಡು. ಎನನ್ ಲೆತೊಂಪೋವರಾ?" ಇಂದ್ ಕೇನುವೆ. ಪಕ್ಕಿಲು ರೆಂಕೆ ರೆಂಕೆ ಮುಡೆದ್ ಆಯನ್ ಬೆರಿಟ್ ಕುಲ್ಲಾವೊಂಡ. ಏಲ್ ಕಡಲ್ ದಾಂಟಾವ.

"ನಿಕುಲು ಮೂಲೆ ಉಂತುಲೆ" ಇಂದ್ ಆಯೆ ಪಕ್ಕಿಲೆನ್ ಉಂತರೆ ಪಂಡ್ ದುಂಬು ಪೋಪೆ. ಅಲ್ಪ ಒಂಜಿ ಕಿರೆ ಇತ್ತಂಡ್. ಕಿರೆತ ಪುಡೆಟ್ ರಕ್ಕಸೆ ಒರಿ ಕುಲೊಂದು ಕಾತೊಂದಿತ್ತೆ.

ಉಂಬೆ ಅಂಗಿ ಪಾಡೊಂಡೆ. ಸಬುದ ಮಲ್ಪಂದೆ ಮೆಲ್ಲ ಕಿರೆಕ್ ಜತ್ತೆ. ಗೋಂಕುರು

ಕಪ್ಪೆ ನೀಂದೊಂದು ಮಿತ್ತ್ ಬತ್ತಂಡ್. ಅವೆನ್ ಪತ್ತಿಯೆ.

ಆತಾನಗ ರಕ್ಕಸಗ್ ಗೊತ್ತಾಂಡ್. ಏರಾ ಕಪ್ಪೆನ್ ಪತ್ಯೆರ್ ಇಂದ್, "ಏರವು?" ಇಂದ್ ಆಯೆ ಆರಬಟೆ ಕೊರಂಬತ್ತೆ. ಉಂಬೆ ಕೈಟತ್ತಿನ ಕಪ್ಪೆದ ಒಂಜಿ ಕಾರ್ ಪೊಲ್ತೆ. ಅದಗ ರಕ್ಕಸನ ಒಂಜಿ ಕಾರ್ ಪೊಲಿಂಡ್. ಅವೆನ್ ತೂಯಿನ ಉಂಬೆ ಕಪ್ಪೆದ ನನೊಂಜಿ ಕಾರ್ ಪೊಲ್ತೆ. ರಕ್ಕಸನ ನನೊಂಜಿ ಕಾರ್ಲಾ ತುಂಡಾದ್ ಆಯೆ ಆ ಕೆದುಕು ಬೂರೈ.

ಉಂಬೆ ಅಂಗಿ ದೆತ್ತ್ ಕೈಟ್ ಪಸೊಂಡೆ. ಪಕ್ಕಿಲು ಇತ್ತಿನಡೆ ಬತ್ತೆ. ಅಯ್ಯಾಲೆನ ಬೆರಿಟ್ ಕುತೊಂದು ಏಲ್ ಕಡಲ್ ದಾಂಟ್ ದ್ ಮಾಟ ಮಂತ್ರದಾಯನ ಇಲ್ಲ ಕಡಿಕೆ ಪಿರ ಬತ್ತೆ. ಕೇಂಜವ ಪಕ್ಕಿಲೆನ್ "ಪೋಲೆ" ಇಂದ್ ಕಡಪುಡೈ. ಮಾಯದ ಅಂಗಿ ಪಾಡೊಂಡೆ. ಮಾಟ ಮಂತ್ರದಾಯನ ಇಲ್ಲದುಲಯಿ ಪೊಗ್ಗಿಯೆ.

ಆತ್ ಪೊರ್ತುಗು ಮಂತ್ರದಾಯೆ ಪೂಜೊಗು ಕುಲ್ಲುದಿತ್ತೆ. ಒರ್ತಿ ಪೊಣ್ಣನ ತರೆ ಕಡ್ಬರೆಂದ್ ಕತ್ತಿ ಕೂಟ್ ದೀತೆ. ತನ ಮಂತ್ರದ ಅಂಗಿ ಓಲುಂಡು ಇಂದ್ ಆಯೆ ನಾಡ್ ನಗ ಗೋಡೆಡ್ ಮಂತ್ರದಂಗಿ ಇತ್ತ್ ಜಿ. ಅಯ್ಯಾ ಆಯೆ "ಏರಾ, ಇಡೆಗ್ ಬತ್ತೆದುಪ್ಪೊಡು, ತನ ಮಂತ್ರದಂಗಿನ್ ಕಂಡ್ ದುಪ್ಪೊಡು" ಇಂದ್ ಮಾತ ಪೊಣ್ಣಲೆಗ್ಲಾ ನಾಗರಬೆತ್ತೊಡು ಹಾಕುವೆ. ಅದಗ ಒರ್ತಿ ಪೋಡಿಗ್ ಆದ್ "ಆಣ್ ಒರಿ ಬತ್ತೆ, ಆಯೆ ಆ ಅಂಗಿನ್ ಕಂಡ್ ದ್ ಕೊನೊಯೆಂದ್" ಪಣ್ಣೊಲು.

ದಾದನಾ ಏರೆನವಾ ಮಸಲತ್ ಉಪ್ಪೊಡು ಇಂದ್ ಎನ್ನದ್ ಮಾಟ ಮಂತ್ರದಾಯೆ ಅಂಜನೊಡು ತೂಪೆ. ಅದಗ ಆಣ್ ಇಲ್ಲ ಕಡಿ ಬಾಕಿಲ್ದಾ ಕಪ್ಪೆನ್ ಪತೊಂಬತ್ತದ್ ಉಂತಿನವು ತೋಜೊಂಡು. ಆಯೆ ಮಂತ್ರೊಡು ಕಪ್ಪೆನ್ ತನ ಕೈತಲ್ ಪಾಡೊನ್ನೆ.

ಮಾಟ ಮಂತ್ರದಾಯೆ ಸಟ್ಟಿ ಲಕ್ ದ್ ಕೂಟ್ ದೀತಿನ ಕತ್ತಿನ್ ಪತೊಂದು ಆಣನ್ ಕೆರ್ರೆಂದ್ ಪಾರ್ ಬರ್ಪೆ. ಅದಗ ಬಲಿಕ್ಕಂದ್ ಕೈ ಕಟ್ ಪಾಡ್ತಿನ ಪೊಣ್ಣು ಆಯನ ಕಾರ್ಗ್ ಕಾರ್ ಅಡ್ಡ ಕೊರ್ಪೊಲು. ಮಂತ್ರದಾಯೆ ಬೂರ್ವೆ. ಕೂಡ್ಲೆ ಆಣ್ ಪಾರ್ ಬತ್ತದ್ ಆಯನ ಕೈಟತ್ತಿ ಕತ್ತಿನ್ ಒಯ್ಯದ್ ಕಪ್ಪೆ ಇತ್ತಿನಡೆ ಪೋದು ಅವೆನ್ ಸಿಗ್ ಪಾಡ್ಲೆ. ಆತಾನಗ ಮಾಟ ಮಂತ್ರದಾಯನ ತಿಗಲೆಲಾ ಉಡೆದ್ ಆಯೆ ನೆತ್ತರ್ ಕಾರ್ಡ್ ಸೈಪೆ.

ಆಣ್ ಪದ್ದಾಲ್ ಜನ ಪೊಣ್ಣಲೆನ್ನಾ ಬುಡ್ಪಾದ್ "ನಿಕುಲು ನಿಕಲ್ ಕಲೆನ ಊರುಗು ಪೋಲೆ" ಇಂದ್ ಪಣ್ಣೆ. ಪಿಲಿತ ಪಾಂಜರದಡೆಗ್ ಬತ್ತದ್ ಅವೆನ್ನಾ ಬುಡ್ಪಾವೆ. ಅಯಿಟ ತನ



ಕತೆ ಪನ್ನೆ, ತಿದ್ಯಪ್ಪನ ಬಾಲೆಗ್ ಪಿಲಿತ ಪೇರ್ ಕನರೆಂದ್ ಪಿದಾಡ್ಲಿತ್ತಿನಾಯೆ ತಾನ್ಂದ್ ಪನ್ನೆ.

ಪಿಲಿ ಪನ್ನಂಡು, "ಬಲಾ, ಎನ್ನ ಇಲ್ಲಗ್ ಪೋಯಿ" ಆಯೆ ಪಿಲಿತ ಬೆರಿತ ಮಿತ್ತ್ ಕುಲ್ಲುವೆ. ಆತಾನಗ ಪದಿಮೂಜಿ ಜನ ಪೊಣ್ಣುಲು ತನ್ಕಲೆ ತನ್ನಲೆ ರಾಜೊಗು ಪೋಪೆರ್. ತರೆ ಕಡ್ಪಾವೊನ್ನೆ ಕುಲ್ಲದಿತ್ತಿನಾಲ್ ಒರ್ತಿ ಉಂಬ್ಯನ ಒಟ್ಟುಗೇ ಬರ್ಪೊಲು.

ಅಕುಲು ಇರ್ವೆರಪ್ಪ ಪಿಲಿತ ಬೆರಿಟ್ ಕುತೊಂದು ಕಾಡ್ಗ್ ಪಿಲಿತ ಮಾಟೆದಡೆ ಬತ್ತ ಉಂತುವೆರ್. ಅದಗ ಪೊಣ್ಣು ಪಿಲಿ ತನ ಕಂಡೆನಿ ಆಣ್ ಪಿಲಿ ಬತ್ತಿನ ತೂದು ಸಂತೋಸುಡು ನಲ್ಪೊಂಡು. "ಯಾನ್ ಬತ್ತದ್ ಪೇರ್ ಕೊರ್ಪೆ, ನಿನ ಇಲ್ಲಡೆ ಪೋಯಿ" ಇನ್ನುಂಡು.

ಆಯೆಲಾ, ಆ ಪೊಣ್ಣುಲಾ ಪೊಣ್ಣು ಪಿಲಿತ ಬೆರಿಟ್ ಕುಲೊಂದು ಪಿದಾಡುವೆರ್. ಆಯೆ ಸುರುಕು ಪೊಣ್ಣನ ಎರಮನೆಗ್ ಪೋಯಿನ್ನೆ. ಅಡೆಗ್ ಪೋದು ಅಕಲೆಗ್ ಸಂಗತಿ ಮಾತಾ ತೆರಿದ್ ಅಲ್ತ ರಾಜೆ ತನ ಮಗಲೆನ್ ಬಚವು ಮಲ್ತಿನ ಉಂಬ್ಯಾಗ್ ಅಲೆನ್ ಮದಿಮೆ ಮಲ್ತದ್ ಆಯನೇ ಪಟ್ಟೊಡು ಕುಲ್ಲಾವೆ.

ಉಂಬ್ಯೆ "ಎನ ತಿದ್ಯಪ್ಪೆಗ್ ಪಂತಿ ಪಾತೆರದಂಚ ಪಿಲಿತ ಪೇರ್ ಕೊರೊಡುಂದ್ ಪನ್ನೆ. ಪಿಲಿತ ಬೆರಿಟ್ ಕುಲೊಂದು ತನ ತಿದ್ಯಪ್ಪೆ ಇತ್ತಿನಡೆಗ್ ಬರ್ಪೆ. ಅಲೆನ ಬಾಲೆಗ್ ಪಿಲಿತ ಪೇರ್ ಕೊರ್ಪಾವೆ. ತಿದ್ಯಪ್ಪೆ ಪೋಡಿ ಕುಂಬರೊಂದಿತ್ತೊಲು. "ಎನ್ನ ಮಾತಾ ತಪ್ಪಾಂಡ್ ಮಗಾ" ಇಂದ್ ಮಾಪು ನಟಿಯೊಲು. ಆಯೆ ತಿದ್ಯಪ್ಪೆನ್ನಾ ಅಲ್ತ ಜೋಕ್ಲೆನ್ನಾ ಎರಮನೆಗ್ ಲೆತೊಂಬತ್ತೆ. ಬೊಕ್ಕ ಮಾತೆರಪ್ಪ ಒಟ್ಟುಡು ಸುಕೋಟಿತ್ತೆರ್.

○ ಕತೆ ಪಂಡಿನಾರ್ : ಶ್ರೀಮತಿ ಭವಾನಿ, ಮಲ್ಲೆ

ಪೊಂಗಾರ್ಡ ಪೊಣ್ಣು

ಬರಿಟ್ ಬೋಂಟೆದಾಯೆ ಒರಿ ಉಪ್ಪುವೆ. ಆಯಗ್ ಆ ಕಾಡ್ ಅರಸ್ತಾನ. ಆಯನ ಒರ್ತಿಯೇ ಮಗಲ್. ಅಮ್ಮೆಲಾ ಮಗಲ್ಲಾ ಒಂಜಿ ಕಾಡ್ ಪುಡೆತ್ತ ಇಲ್ಲಡಿತ್ತೆರ್. ಅಮ್ಮೆ ಒಂಜಿ ದಿನ ಕಾಡ್‌ದುಲಾಯಿ ಮುರ್ಗ ಬೋಂಟೆಗ್ ಪೋಯೆ. ಬನ್ನಗ ಕಾಡ್‌ಡ್ ಒಂಜಿ ಪಿಲಿತ ಕಿಂನಿನ್ ಪತ್ತದ್ ಮಗಲೆಗ್ ಗೊಬ್ಬರೆ ಆವುಂದ್ ಪತೊಂಬರ್ಪೆ. ಇಲ್ಲಗ್

ಬತ್ತದ್ ಮಗಲೆಡ ಪಿಲಿತ ಕಿಂನಿನ್ ಕೊರ್ಪೆ.

ಮಗಲ್ ಪಿಲಿತ ಕಿಂನಿನ್ ಪತೊಂದು ಗೊಬ್ಬೊಂದು ಇತ್ತೊಲು. ಆಂಡ ಆ ಪಿಲಿತ ಕಿನ್ನಿ ಗೊಬ್ಬು ಗೊಬ್ಬುದು ಆಲೆನ ಸೀರೆನ್ ಮಾತಾ ಪರಿತ್ ಪಾಡೊಂದಿತ್ತಂಡ್. ಆಲ್ ದಿನಾಲ ಪೊಲ್ಲೊಂದಿತ್ತೊಲು. ಅವು ದಿನಾಲ ಪರ್ತೊಂದಿತ್ತಂಡ್. ಆಲ್ ಕೈ ಕಾರ್ಗ್ ಮಾತ ಪರ್ಂಕ್ದ್ ಗಾಯ ಮಲ್ತೊಂದಿತ್ತಂಡ್.

ಮಗಲೆಗ್ ಪಿಲಿತ ಕಿಂನಿದ ಕಾಟ ತಡೆಯೆರೆ ತೀರ್ಜಿ. "ಇಂದಾ ಮಗಾ, ಈ ಇಂಚ ಎನ್ನ ಸೀರೆ ದಿನೊಕ್ಕೊಂಜಿ ಪರ್ತೊಂದಿತ್ತಡ ಎನ ಅಮ್ಮೆ ಎನನ್ ಕೆರ್ದ್ ಪಾಡೆ" ಇಂದ್ ಪಿಲಿತ್ತ ಕಿಂನಿಗ್ ಪಣ್ಣೊಲು. ಅವು ಕೇನೊಜಿ. ಅಪಗ ಮಗಲ್ ಬೇಲೆದಕಲೆನ್ ಲೆತ್ತದ್ ಒಂಜಿ ಪೊಂಗರ್ದ ಮರ ಕಡ್ಪಾವೊಲು. ಅಯಿಟ್ ಏಲ್ ಅದೆ ಮಲ್ಪಾವೊಲು, ಆಜಿ ಅದೆಟ್ ಆಲೆನ ಕುಂಟು ರಾಕಿ, ಅಡ್ಡೆ ಪುಂಡಿ ಮಾತ ದಿಂಜಾಯೊಲು. ಏಲನೇ ಅದೆಟ್ ಆಲ್ ಕುಲೊಂಡೊಲು.

ಆಲೆನ ಅಮ್ಮೆ ಮನದಾನಿ ಕಾಂಡೆ ಲಕ್ದ್ ತೊನಗ ಮಗಲಿಜ್ಜೊಲು. ಪಿಲಿತ ಕಿಂನಿ ಮಗಲೆನ್ ತಜತ್ತ ತಿಂದಂಡಾ ದಾನ್ಯಾಂದ್ ಎನ್ನಿದ್ ಅವೆನ್ ಕುಟುದು ಗಿಡಾವೆ. ತಡ್ಯದಲ್ಪ ಆಯೆ ಬನ್ನಗ ಕಾರ್ಗ್ ಪೊಂಗಾರ್ಡ ಪೆಟಿಗೆ ದಂಕೊಂಡು.

ಆತಾಕಿನೇ ಆಯಗ್ ಬೊಕ್ಕಲಾ ಪಿಸ್ಕರ್ ಏರೊಂಡು. "ಎನ ಮಗಲ್ಲಾ ಇಜ್ಜೊಲು, ನನ ಉಂದೊಂಜಿ ಮೂಲು ತಡ್ಯದ ಕಡಿಟ್ ದಂಟರೆ ದಾಯೆಗ್" ಇಂದ್ ಪೊಂಗಾರ್ಡ ಪೆಟಿಗೆನ್ ತುಂಬೊಂದ್ ಪೋದು ಕಡ್ಲೆಗ್ ಒಯ್ತ ದಕ್ಕುವೆ.

ಕಡಲ್ಡ್ ಆ ಪೆಟಿಗೆ ಅಂಚಿನೇ ನೀಂದೊಂದು ನೀಂದೊಂದು ನನೊಂಜಿ ದೇಸೊಗು ಪೋಪುಂಡು. ಅಲ್ಪ ಕಡಲ್ದ ದಂಡೆಗ್ ಬತ್ತದ್ ಒಂದುದು ಉಂತೊಂಡು.

ಆ ಊರ್ಡ ಅರಸುನ ಮಗೆ ಮೀಯರೆಂದ್ ಕಡಲ್ಗ್ ಬತ್ತೆ. ಆಯೆ ಈ ಪೊಂಗಾರ್ಡ ಮರತ ತುಂಡುದಂಚ ತೋಜುನೆನ್, "ಉಂದು ಇಲ್ಲಡ್ ತೊಪೊತ್ತಾವರೆ ಕನಕ್ಗ್ ಆವು" ಇಂದ್ ಪಣ್ಣ್ ಅವೆನ್ ದೆರ್ತ ತುಂಬೊಂದು ಪತೊಂಪೋದು ಅರಮನೆತ ಕೈತಲ್ ತೋಟೊಡು ಪಾಡ್ಲೆ.

ಆ ತೋಟೊಡು ಒಂಜಿ ಪೂ ಬಾರೆದ ಬಾರೆ ಕೈಲ್ ಪಾಡ್ಲೆತ್ತಂಡ್. ಕೈಲ್ ಇಡೀ ಪಂದ್‌ದಿತ್ತಂಡ್. ಪೊಂಗಾರ್ಡ ಮರತ ತುಂಡುದ ಉಲಯಿ ಏಲದೆಟ್ ಕುಲ್ಲುದಿನ ಪೊಣ್ಣಗ್ ತಿನ್ನಿನ ಮಾತ ಮುಗ್ಗಿದ್ ಬಡವಾವೊಂದಿತ್ತಂಡ್.



ಆಲ್ ನಡುರಾತ್ರೈಡ್ ಲಕ್‌ದ್ ಬಂಗಾರ್ದ್ ಬಿಸತ್ತಿಲಾ ಬೊಲ್ವಿದ ಅರಿಯಾಣಲಾ ಪತೊಂದು ಅಯ್ಯ್ ಪಂದ್ ಒಡ್ ಪತೊಂದು ಅಲ್ ಕೋಣೆದುಲಯಿ ಸೇರಿಯೊಲು.

ತೋಟದ ಬೇಲೆದಕುಲು ಮನದಾನಿ ತೂನಗ ಪೂ ಬಾರೆದ ಪಂದ್ ಕಂಡ್‌ದಿನ ಗೊತ್ತಾಪುಂಡು. ಅಕುಲು ಮನ್ನಾನಿ ಕಾತ್ ಕುಲ್ಲವೆರ್. ರಾತ್ರೈ ಆನಗ ಅಕಲೆಗ್ ನಿದ್ರೆ ಬತ್ತಂಡ್. ಅದಗ ಪೊಣ್ಣು ಪಂದ್ ಕಂಡೊಲು. ಕಲ್ವೆರ್ ಏರ್‌ಂದ್ ಗೊತ್ತಾಪುಜಿ. ಮನದಾನಿಲಾ ಪಂದ್ ಕಂಡ್ ಪೋಪುಂಡು. ಕಂಡಿನಕುಲು ಪತ್ತರೆ ತಿಕ್‌ಜೆರ್. ಇಂಚೆನೇ ಮೂಜಿನಾಲ್ ದಿನ ಆಪುಂಡು.

ಆನಿ ಅರಸು ಮಗನೇ ಕಲ್ವೆರನ್ ಪತ್ತೊಡೇ ಇಂದ್ ಕಾತ್ ಕುಲ್ಲವೆ. ನಡು ರಾತ್ರೈದ ಪೂರ್ತು, ಆಯಗ್ ನಿದ್ರೆ ಬರ್ಪುಂಡು. ಅಪಗ ಪಂದ್ ಕಂಡ್ ಪೋಪುಂಡು. ಮನದಾನಿ ರಾತ್ರೈಡ್ ಆಯೆ ತನ ಕಿನ್ನನ ಬಿರೆಲ್ ಕುತ್ತುದು ಅಯ್ಯ್ ಉಪ್ಪು ದೀದ್ ಎಚ್ಚೆರ್ಗಡ್ ಕಾತ್ ಕುಲುವೆ.

ನಡು ರಾತ್ರೈ ಆಪುಂಡು. ಬೋಂಟೆದಾಯನ ಮಗಲ್ ಏಪದಲೆಕ್ಕನೆ ಪೊಂಗರ್ದ ಪೆಟಿಗೆಡ್ ಪಿದಯಿ ಬರ್ಪೊಲು. ಆಲ್ ಪಂದ್‌ಗ್ ಕೈ ಪಾಡ್ಡಗ ಅರಸು ಮಗ ಪಾರ್ ಬತ್ತದ್ ಅಲ್ ಕೈಗಟ್ಟಿ ಪತ್ತುವೆ. ಆಯೆ ಕೇಂಡೆ, "ಈ ಏರ್, ಒಲ್ಲು ಬತ್ತ, ದಾಯೆಗಸ್ಸು ಇಂಚ ಪಂಡೊಂದುಲ್ಲ? ನಿನ್ನ ಅಪ್ಪೆಮ್ಮೆ ಏರ್?" ಇಂದ್ ಕೇನುವೆ.

ಅಪಗ ಬೋಂಟೆದಾಯನ ಮಗಲ್ ಬುಲೊಂದು ಅಲೆನ ಕತೆ ಪೂರ ಪಣ್ಣೊಲು. "ಎನ ಅಪ್ಪೆ ಸೈದೊಲು. ಅಮ್ಮೆ ಕಾಡ್ಡರಸು ಬೋಂಟೆದಾಯೆ. ಆಯೆ ಒಂಜಿ ದಿನ ಪಿಲ್ಲ ಕಿಂನಿನ್ ಇಲ್ಲಗ್ ಕಣತೆ. ಅಯ್ತು ಉಪ್ಪೊಳಿ ತಡೇರೆ ತೀರಂದೆ ಯಾನ್ ಪೊಂಗಾರ್ದ ಪೆಟಿಗೆ ಮಲ್ಪಾದ್ ಅಯ್ತುಲಯಿ ಕುಲ್ಲಿಯೆ. ಅವು ಕಾರ್‌ಗ್ ದಂಟನೆಕ್ ಎನ ಅಮ್ಮೆರ್ ಒಯ್ಯಾದ್ ಕಡಲ್‌ಗ್ ದಕ್ಕಿರ್. ಕಡಲ್ ಎನ ಪೆಟಿಗೆ ಈ ಊರುಗು ಬತ್ತ ಸೇಂಡ್. ರಾತ್ರೈಗ್ ಬಡವಾಪಿನೆಕ್ ಪಂದ್ ಕೊಯ್ ತಿನ್ನೆ" ಇಂದ್ ಪಣ್ಣೊಲು.

ಅರಸು ಮಗ ಅಲ್ ಪೂರ್ತು ತೂದು "ಈ ಎನನ್ ಮದ್ಮೆ ಆಪನಾ?" ಇಂದ್ ಕೇನ್ನೆ. ಅಯ್ಯ್ ಆಲ್ "ಈ ಪಿಲಿಕ್ ಪೋಡಿವನಾ?" ಇಂದ್ ಅರಸು ಮಗನ್ ಕೇನ್ನೊಲು. "ಇಜ್ಜಿ, ಈ ಪೋಡಿವನಾ?" ಇಂದ್ ಆಯೆ ಕೇಂಡೆ. ಆಲ್ "ಇಜ್ಜಿ" ಪಂಡೊಲು. ಅರಸು ಮಗ ಅಲೆನ ಕಣ್ಣ್ ಒಂಜಿ ಬಾಯಿಡ್ ಉರ್ಪುವೆ. ಆಲ್ ಕಣ್ಣ್ ಮುಚೊಂಡೊಲು. "ಅಲಾ, ಈಯಾಂಡ ಪೋಡಿವಾ" ಇಂದ್ ಆಯೆ ತೆಲ್ಪುವೆ. ಆಲ್ಲಾ ತೆಲ್ಪುವೊಲು. ಮದ್ಮೆ ಆವರೆ

ಒಪ್ಪಿವೊಲು.

ಅರಸು ಮಗೆ ಮನದಾನಿ ಕಾಂಡೆ ಕಾಡ್ಲರಸು ಬೋಂಟೆದಾಯಗ್ ಪೊದುತ ಓಲೆ ಕಡಪುಡ್ಲೆ. ಆಯೆ ಬರ್ಪೆ. ಮದ್ಮೆ ನಿಚ್ಚಯ ಆದ್ ಎಲ್ಲೆ ಅರಸು ಮಗಕ್ಲಾ ಆ ಪೊಣ್ಣಾಗ್ಲಾ ಬಾರೀ ಗಡ್ಡದ ಮದ್ಮೆ. ಯಾನ್ ಪೋಪೆ. ನಿಕುಲ್ಲಾ ಬಲೆ.

○ ಕತೆ ಪಂಡಿನಾರ್ : ಶ್ರೀಮತಿ ತುಂಬೆ ಪೂಜಾರ್ತಿ, ಮೂಡುಬೆಳ್ಳೆ

ಕೈಕಂಜಿ ಮೇಪುನಾಯೆ

ಕತೆ ಪಂಡ ಉಂದೊಂಜಿ ಅರಸುಲ್ವ ಕತೆ. ಒಂಜಿ ಊರುಡು ಒರಿ ಅರಸುಲು ಉಪ್ಪುವೆರ್. ಅರೆನ ಬುಡೆದಿಲಾ ಇತ್ತೆರ್. ಅಕ್ಲೆಗ್ ಮದಿಮೆ ಆದ್ ಮಸ್ತ್ ಒರ್ಪ ಕರಿಂಡ್. ಆಂಡ ಅರಸುಲೆ ಬುಡೆದಿಗ್ ಬಂಜಿ ಬತ್ತ್ ಜಿ.

ಎಂಕ್ಲೆಗ್ ಜೋಕುಲು ಆಯಿಜೇಂದ್ ಅರಸುಲು ಬೆಚ್ಚೊಡು ಕುಲೋಂದು ಇತ್ತೆರ್. ಅಪಗ ಊರ್ಡಕುಲು ಪಣ್ಣೆರ್ "ದೇವರೆಡ ನಟ್ಟೊಡು, ಅದಗ ನಿಕ್ಲೆಗ್ ಜೋಕುಲು ಆವೆರ್" ಇಂದ್, ಅರಸುಲೆ ಬುಡೆದಿಲಾ, "ಅಂದ್ ನಮ ದೇವರೆಡ ಕೆನೊಡು" ಪಣ್ಣೆರ್.

ಅರಸುಲು ದೇವರೆನ್ ತೂವೊಡು, ಆರೆಡ ಕೇನೊಡು ಇಂದ್ ಪಿದಾಡಿಯೆರ್. ನಡತ್ತ್ ನಡತ್ತ್ ನಡತ್ತ್ ರಡ್ಡ್ ದಿನ ಕರಿಂಡ್. ದೇವೆರ್ ತಿಕ್ಕಚೆರ್. ಮೂಜನೆ ದಿನತಾನಿ ದೇವೆರ್ ನರಮಾನ್ಯನ ರೂಪ ಆದ್ ಅರಸುಲೆ ತಾದಿದಡ್ಡ ಬತ್ತೆರ್.

ಕೇಂಡೆರ್, "ಈರ್ ಓಡೆ ಪೋಪಿನಿ?"

"ಓಡೆಗಾಂಡ ನಿಕ್ಕ ದಾಯೆ?" ಇಂದ್ ಅರಸುಲು ಕೋಪೊಡು ಪಾತೆರೆರ್. ಅಯ್ಯ್ ದೇವೆರ್ ಕುಡ ಕೇಂಡೆರ್, "ಈರ್ ಇಲ್ ಪಗೆಲ್ ನಡಪ್ಪುನ ತೋಜೂಂಡು. ಪನ್ನೆ, ಈರ್ ದಾಯೆಗಿಂಚ ಉದೊಗಪ್ಪ ನಡತೋಂದು ಪೋವೊಂದುಲ್ಲರ್ ಎನಡ ಪನ್ನೆ" ನಿನಡ ಪನ್ಂಡ ಎನ್ನ ಕೆಲಸ ಮಲ್ತ್ ಕೊರ್ಪನಾ ಈ?

"ದಾದಂದ್ ಪನ್ನೆ ತೂಕ, ಎನಡ್ ಆಪುಂಡಾಂದ್!"

"ಅಂಚಾಂಡ ತುಲಾ, ಎಂಕ್ಲೆ ಮದಿಮೆ ಆದ್ ಏತೋ ಒರ್ಪ ಕರಿಂಡಲಾ ಎನ್ನ

ಬುಡೆದಿ ಒಂಜಿ ಬಾಲೆ ಪೆದ್ದಾ ಜೊಲು. ಕೇಂಡಿನ ಮರ್ದಾ ಮಸಿರಿ ಮಾತ ಮಲ್ತೆ. ಎಂಕ್ಲೆವುಲು ಆನೆಲು ರಡ್ಡಾ ಉಲ್ಲ, ಅಯ್ಯುಲ್ಲಾ ಕಿನ್ನಿ ದೀತ್‌ಜ, ನಾಯಿಲು ರಡ್ಡಾ ಉಲ್ಲ, ಅವುಲಾ ಕಿನ್ನಿ ದೀಜಿ. ಎನ್ನ ಬುಡೆದಿಲಾ ಪೆದ್ದಾ ಜೊಲು. ಅಯ್ಯಾ ದೇವರೆಡ ಕೇನ್‌ಗಾಂದ್ ಯಾನ್ ನಾಡೊಂದು ಪೋಪಿನಿ"

"ಇಂದೇ, ಇಂಚ ನಡತ್‌ಂಡ ದೇವೆರ್ ತಿಕ್ಕಯೆರ್ ಈರೆಗ್. ಈ ತಾದಿ ಬುಡ್ಡು ಓ ಅಲ್ಪ ಬಲತ್ತ ಮೆಯ್ತ ಉಲ ಸಾದಿಡ್ ಪೋಲೆ. ಅಲ್ಪ ಒಂಜಿ ಕಾಡ್ ತಿಕ್ಕುಂಡು. ಆ ಕಾಡ್‌ಡ್ ಒಂಜಿ ಕುಕ್ಕುದ ಮರ ಉಂಡು. ಆ ಕುಕ್ಕುದ ಮರತ ಕೊಡಿಟ್ ಏತ್‌ಲಾ ಕುಕ್ಕು ಉಂಡು. ಬೇತೆ ಮಾತಾ ಕುಕ್ಕುಡು ಪುರಿ ಉಂಡು. ಆಂಡ ಕೊಡಿ ಗೆಲ್ಲಾಡೊಂಜಿ ಎಡ್ಡೆ ಕುಕ್ಕು ಉಂಡು. ಆ ಗೆಲ್ಲಾದ ಕುಕ್ಕು ಕೊಯ್ಯರೆ ಪೋವೊಡಾಂಡ ಪಣೀತ್ ಜಾಗ್‌ರ್ತೆಡ್ ಕೊಯ್ಯೊಡು. ತಿರ್ತ್ ನೆಲಕ್ ಅವು ಬೂರ್‌ಂಡ ಮಿನಿ ಅಯಿಟ್ ಪುರಿ ಆಪುಂಡು. ಆತ್ ಜಾಗ್‌ರ್ತೆಡ್ ಅವೆನ್ ಕೊಯ್ಯ್, ಅವೆನ್ ಇಲ್ಲಗ್ ಪತೊಂಪೋಲೆ. ಆ ಕುಕ್ಕುನು ಈರ್ ಬುಡೆದಿಗ್, ಆನೆಲೆಗ್, ನಾಯಿಲೆಗ್ ತಿನರೆ ಕೊರ್ಲೆ. ಅದಗ ಈರೆಗ್ ಸಂಸಾರ ಸಂತಾನ ಆಪುಂಡು" ಇಂದ್ ಪಂಡೆರ್. ಪಂಡ್‌ದಾದ್ ಅಂಚಿಂಚಿ ತೂನಗ ಆ ನರಮಾನಿ ಇಜ್ಜಾಂಡ್.

ಅರಸುಲು ಅಂಚೆನೇ ದುಂಬು ಪೋದು ಪೋದು ಆ ಕುಕ್ಕುದ ಮರತ ಮುದೇಲೆಗ್ ಬತ್ತೆರ್. ಮರನ್ ತೂನಗ ದಿಂಜ ಕುಕ್ಕು ಇತ್ತ್ಂಡ್. ಕೊಡೀತ ಗೆಲ್ಲಾಡ್ ಬೇತೆನೇ ನಮುಂದ ಕುಕ್ಕು ತೋಜಿಂಡ್.

ಅರಸುಲು ಕುಕ್ಕುದ ಮರಕ್ ಮಿತ್ತರ್ದ್ ಕೊಡಿ ಗೆಲ್ಲಾದ ಕುಕ್ಕು ಜಾಗ್‌ರ್ತೆಡ್ ಕೊಯ್ಯ್ ಮೆಯ್ಸಲಿಡ್ ಕೊಟೊಂಡೆರ್. ತಿರ್ತ್ ಜತ್ತಾದ್ ಬತ್ತಾದ್ ಇಲ್ಲಡ್ ಬುಡೆದಿಗ್, ನಾಯಿಲೆಗ್, ಆನೆಗ್ ಅವೆನ್ ತಿನರೆ ಕೊರ್ಪೆರ್.

ಕುಕ್ಕು ತಿಂದ್‌ದ್ ಒಂಜಿ ತಿಂಗೊಲಾನಗ ತಿಂದಿನಕುಲು ಬಂಜಿನಕುಲಾಯೆರ್. ಬಂಜಿನಾಲಾದ್ ಅರಸುಲ್ಲ ಬುಡೆದಿ ಸುರುಕು ಪೆದ್ದಿಯೆರ್, ಪೊಣ್ಣು ಬಾಲೆ. ಆರ್ ಪೆದ್ದಾದಾನಗ ಅಕಲ್ಲ ಇಲ್ಲದ ಎದುರ್ಡು ಒಂಜಿ ಉಗುರ್ಸುತ್ತುದ ದೈಲಾ ಬೂಮಿಡ್ ಉದಿಯ ಬೆಂದ್‌ಂಡ್. ಬಾಲೆ ಮಲ್ತೆ ಆವೋಂದ್ ಬತ್ತಿಲೆಕ್ಕೊನೆ ಉಗುರುಸುತ್ತುದ ದೈಲಾ ಮಲ್ತೆ ಆವೋಂದು ಮರ ಆಂಡ್. ಅಂಚೆನೇ ಅರಸುಲೆನ ಆನೆ ಕಿನ್ನಿ ದೀಂಡ್. ನಾಯಿಲು ಕಿನ್ನಿ ದೀಯ.

ಅರಸುಲ್ಲ ಬಾಲೆ ಪೊಣ್ಣು ಪೋದು ಪೊಂಜೊವಾಯೊ. ಅರಸುಲ್ಲ ಬುಡೆದಿ ಅರಸುಲೆಡ ಪಂಡೆರ್, "ಅಂದೆಯೆ ನಮ ಮಗಲ್ ಮಲ್ತೆ ಆಯೊಲು. ನನ ಮೊಲೆಗ್ ಏರಾಂಡ ಎಡ್ಡೆ ಆಣ್ ತೂದು ಮದಿಮೆ ಮಲ್ಪೊಡತ್ತೇ?"

ಅರಸುಲು "ಕೊರ್ಟುನಾಂಡ ಏರೆಗ್ ಕೊರ್ಪುನೇ? ನಮ ಒಂಜಿ ಪಂತ ದೀಡ್‌ಗ. ನಮ ಜಾಲ್‌ಡ್ ಈಯೊಂಜಿ ಮರ ಉಂಡತ್ತ, ಅವು ಎಂಚಿನೈತ ಮರಂದ್ ಏರೆಗ್ಲಾ ಗೊತ್ತಿಜ್ಜಿ. ಉಂದು ದ್ಯಾತೆತ ಮರಂದ್ ಪಣ್ಣಾಯಗ್ ಎನ್ನ ಮಗಲೆನ್ ದರ್ಮದಾರೆ ಮಯ್ತ್ ಕೊರ್ಪೆ ಇಂದ್ ಡಂಗುರ ಸಾರುನು" ಅರಸುಲು ಅಂಚಿನೇ ಡಂಗುರ ಪಾಡ್ಪಾಯಿರ್.

ಏರೆಗ್ಲಾ ಗೊತ್ತುಜ್ಜೇ, ಆತಾನಗ ಡಂಗುರ ಕೇಂದ್ ಏರೇರ್ ಬಾರೀ ಮಲ್ಲಕುಲು ಮಾಂತ ಬತ್ತೆರ್. ಅಕುಲು ಬರ್ಪುನೇ, ಬತ್ತೆದ್ ನೀರ್ ದೆತ್ತೆದ್ ಕೈಕಾರ್ ದೆಕ್‌ದ್ ಕುಲ್ಲನೆ, ಒಣ್ಣೆ ಮಲ್ಲನೆ, ಮರನ್ ತೂಪುನೇ ತರೆಕಂತ ಪಾಡೊಂದು ಪೋಪುನೆ. ಏರೆಗ್ಲಾ ಈ ಮರತ ದ್ಯಾತೆತ ಮರ ಇಂದ್ ಪಣಿಯರೆ ತೆರಿಯುಜಿ.

ಬತ್ತಿನಕುಲು ಮಾಂತ ಅಗತ್ತೆದ್ ಬೊಕ್ಕ ಅರಸುಲೆನ ಬುಡೆದಿ ಮಾತ್ರ ಒರಿಯಿರ್. "ಈತ್ ನೇಲ್ಯ, ನೇಲ್ಯ ಬಿಸೆರ್ ಮಾಂತ ಬತ್ತೆರ್. ಈ ಉಗುರ್ಸುತ್ತುದ ಮರತ ಪುದರ್ ಪಣಿಯರೆ ಏರೆಗ್ಲಾ ಗೊತ್ತಾಯಿಜೇ?" ಇಂದ್ ಅಕುಲಕುಲೇ ಪಾತೆರೊಂಡೆರ್.

ಆತಾವನಗ ಅರಸುಲೆ ಇಲ್ಲದ ಪಿರುವುಡೆ ಒರಿ ರಕ್ಕಸೆ ದೆಂಗ್ ಕುಲ್ಲದಿತ್ತೆ. ಆಯೆ ಅರಸುಲ್ಲಾ ಆರ್ ಬುಡೆದಿಲಾ ಪಣ್ಣಿನಾ ಪಾತೆರೊಗು ಕೆಬಿ ಕೊರ್ಪೆ.

ರಕ್ಕಸಗ್ ಈ ಗುಟ್ಟು ಗೊತ್ತಾಪುಂಡು. ಆಯಡ ಉಣ್ಣಿನ ತಿನ್ನಿನ ವಸ್ತಾಲೆನ ಏಲ್ ಗಾಡಿ ಉಂಡು. ಮನದಾನಿ ಆಯಿಟ್ ಒಂಜಿ ಗಾಡಿಡ್ ಕುಲ್ಲೊಂದು. ಅರಸುಲೆನ ಇಲ್ಲ ಕಡೆಕ್ ಬತ್ತೆ. ಬನ್ನಗ ಆಯೆ ಮಾಯಕೊಡು ಗಾಡಿ ದೇರುನ ನರಮಾನ್ಯಲೆಕ ಬತ್ತೆ.

ಬನ್ನಗ ಮೂಲು ಕುಡ ಬಾರೀ ಬಾರೀ ಜನೊಕುಲು ಉಲ್ಲೆರ್. ಮಾಂತ ಅಕ್ಕೆ ಉಲಯಿಡ್ ಗುಸುಗುಸು ಪಾತೆರೊಂದು ಉಲ್ಲೆರ್. ಈ ಮರತ ಪುದರೊಂಜಿ ಗೊತ್ತಾಪುಜತ್ತಾ ಇನೊಂದುಲ್ಲೆರ್.

ಗಾಡಿ ದೇರುನಾಯೆ, ಗಾಡಿನ ಬರಿಟ್ ಉಂತಾಯೆ, ಅರಸುಲ್ಲ ಕೈತಲ್ ಬತ್ತೆ, "ಅರಸುಲೆ, ಯಾನ್ ಪಂತೊಗು ಉಲ್ಲೆ" ಇಂದ್ ಲೆತ್ತೆ ಪಂಡೆ.

"ಯೈಬೆ, ಬಾರೀ ಬಿಸೆರೆಡ್ ಮಲ್ಲ ಮಲ್ಲ ಜನಕುಲೆಡ್ ಗೆಂದರೆ ಆವಂದಿನ ಪಂತೊನು ಈ ದಾದ ಗೆಂದುನು?"

"ಅಂಚತ್ತೆ, ಪಂತ ಎಂಚಿನ ಪಣ್ಣೆ"

"ಅಂಚಾಂಡ, ಓ ಆ ಮರತ ಪುದರೊಂಚಿನ ನಿಕ್ಕ ಪಣ್ಣರೆ ತೀರುವಾ?" ರಕ್ಕಸೆ

ದೆಂಗ್‌ದ್ ಕುಲ್ಲುದು ಕೇಂದೆನೇ, ತಟಕ್ಕನೆ ಪಂಡೆ, "ಓಹೋ ಅವ್ವಾ, ಅವು ಉಗುರ್ಸುತ್ತುದ ಮರ ಅತ್ತೇ?"

"ಓಬ್ಬಾ", ಇಂದ್ ಅರಸುಲು, ಅಲಕ್ಕದ್ ಬೂರೈರ್. ಇಂಬೈ ಪಂಡ್ರಯೇನೇ, ದ್ಯಾತ ಮಲ್ಪುನು: ಪಾತೆರ ಕೊರ್ದಾತ್ಂಡ್. ತಪ್ಪರೆ ಆಪುಜಿ. ಮಗಲೆನ್ ಆಯಗೇ ಮದ್ದೆ ಮಲ್ತ್ ಕೊರೊಡಾಂಡ್. "ಆವು" ಇಂದ್ ಒಪೈರ್.

ಮದಿಮೆ ದಿನ ನಿಗಂಟ್ ಆಂಡ್. ಆನಿ ಪೋಯೆ. ಒಂಜಿ ವಾರ ಆನಗ ರಕ್ಕಸೆ ತನ್ನ ಏಲ್ ಗಾಜಿ ಕಟೊಂದು ಬತ್ತೆ. ಅರಸುಲು ನರಮಾನಿ ರೂಪೊಡುಪ್ಪುನ ಆ ರಕ್ಕಸಗ್ ಮಗಲೆನ್ ಮದ್ದೆ ಮಲ್ತ್ ಕೊರೈರ್. ಏಲ್ ಗಾಡಿಲೆಡ್ ಎರು ಎರ್ಮೆ ಪೆತ್ತ ಕಂಜಿ ಒನಸ್ ತಿನಸ್ ಸಾಮಾನ್ ದಿಂಜಾದ್ ಕೊರ್ಯೆರ್.

ಆಯೆ ಅರಸು ಮಗಲೆನ್ ಗಾಡಿಡ್ ಕುಲ್ಲಾವೊಂದು ಲೆತೊಂದು ಪೋಪೆ. ಒಂತೆ ದೂರ ಪೋನಗ ಅಲೆಡ ಪಣ್ಣೆ, "ಅಂದಯಾ ಎಂಕ್ ಬಡಾವುಂಡು"

ಅದಗ ಆಯನ ಬುಡೆದಿ, "ಈರೆಗ್ ಬಡವಾಂಡ ಯಾನ್ ದಾದ ಮಲ್ಪೊಡು? ಈರೆನ ಈ ಗಾಡಿಡೇ ಮಾತ ಕಾಯಿ ಕಜಿಪು, ಒಣಸ್ ತೆನಸ್ ಉಂಡತ್ತೇ, ತಿನ್ನೆ"ಪಣ್ಣೊಲು.

ಆಯೆ ಒಂಜಿ ಗಾಡಿದ ಸಾಮಾನ್‌ಲಾ ತಿಂದೆ, ಎರ್ಮೆನ್ನಾ ಪೊಲಿತ್ ಪೊಲ್ತದ್ ತಿಂದೆ. "ಉಂದು ದಾದಪ್ಪಾ" ಇಂದ್ ಆಯನ ಬುಡೆದಿಗ್ ಪೋಡಿಗೇ ಲಕ್ಂಡ್. ಆಂಡಲ ಮನಿಪಂದೆ ಕುಲ್ಪೊಲು.

ನಾನೊಂತೆ ದೂರ ಪೋನಗ ಆಯೆ 'ಎಂಕ್ ಬಡವಾಪುಂಡು'ಇಂದೆ. "ಈರೆನ ಗಾಡಿಡ್ ಸಾಮಾನ್ ಉಂಡತ್ತೆ, ತಿನ್ನೆ" ಪಂಡೊಲು ಆಲ್. ರಕ್ಕಸೆ ನಾನೊಂಜಿ ಗಾಡಿದ ಒಣಸ್ ತೆನಸ್ ಬಕ್ಷ ಮಾಂತ ತಿಂದೆ, ಗೋಣನ ಕೈಕಾರ್ ಮಾಂತ ಪೊಳ್ಳಿತ್ ತಿಂದೆ. ಬುಡೆದಿಗ್ ಚಲಿ ಗುದ್ದುಂಡ್. ಉಂಬೆ ರಕ್ಕಸೆನೇ ಆದುಪ್ಪೊಡು ಇಂದ್ ತೋಜಿಂಡ್. ಅಂಚೆನೇ ದುಂಬು ದುಂಬು ಪೋನಗ ಮಾಂತಾ ಏಲ್ ಗಾಡಿಲೆನ ಒಣಸ್ ತೆನಸ್ ತಿಂದ್ ಮುಗಿತ್ತೆ. ಆತಾವನಗ ಆಯನ ಇಲ್ಲ ಬತ್ತಂಡ್. ಅಪಗ ಕುಡ ರಕ್ಕಸೆ ಎಂಕ್ "ಬಡಾವುಂಡು" ಪಣ್ಣೆ.

ಪೋಣ್ಣು ಪಣ್ಣೊಲು, "ಅಪಗಾಂಡ ಇಲ್ಲದುಲಯಿ ಪೋಯಿ, ಯಾನ್ ತೂ ಪೊತ್ತಾದ್ ಅಟಿಲ್ ಮಲ್ಪುವೆ. ಬೊಕ್ಕ ಈರ್ ಉಣ್ಣೆ"

ಉಲಯಿ ಪೋಯೆರ್. ವೋಲು ತೂನಗ ಅಟಿಲ್ ಕೋನೆಡ್ ಸಾಮಾನ್ ಮಾಂತ

ಇತ್ತಂಡಲ, ಕಜಿಪುಗು ಮುಣ್ಣಿ ಇಜ್ಜಾಂಡ್. ಆಯೆ ಪಣ್ಣೆ, "ಅಪಗ, ಈ ಅಟಿಲ್ಲ ಕೋಣೆಡೇ ಕುಲ್ಲು ಅಟಿಲ್ ಮಲ್ತೊಂದುಪ್ಪುಲ, ಯಾನ್ ಪೋದು ಕಜಿಪುಗು ಮುಣ್ಣಿ ಕೊಂದರ್ಪೆ" ತರ್ಕೊಲುದ ಜೊಂಕಿಲ್ ಅಲ್ಪ ದೀಯೆ. ಆಯೆ ಮುಂಚಿ ಕೊಂದರೆ ಪೋಯೆ. ಮೋಲು ದಾನೆ ಮಲ್ತೊಲು, ದಿಕ್ಕೆಲ್ಗ್ ಕಣಕ್ಕ್ ಅಡಕ್ಕ್ದ್ ಸೂ ಪೊತ್ತಾಯೊಲು. ಕರಟ್ ನೀರ್ ಬೆಚ್ಚ ದೀಯೊಲು. ತರ್ಕೋಲ್ಲ ಗೊಂಚಿಲ್ ಪತೊಂದು ಆ ಇಲ್ಲದ ಒಂಜೆಂಚೇ ಕೋಣೆಲೆನ ಬೀಗ ದೆತ್ತಾದ್ ತೂವೊಂದು ಬತ್ತಲ್.

ಸುರೂ ಒಂಜಿ ಕೋಣೆಡ್ ತೂನಗ ಅರಣೆ, ಓಂತಿ ಮಾಂತ ಕೆರ್ದ್ ತಿನರೆಂದ್ ರಕ್ಕಸೆ ದೀತೆ. ಬೊಕ್ಕೊಂಜಿ ಕೋಣೆ ತೂನಗ ಕೇರೆ, ಒಲ್ಲೆ, ನನೊಂಜಿ ಕೋಣೆಡ್ ಕೈಕಂಜಿ ಕಡ್ತ ದೀತ್ಂಡ್. ಅಕೇರಿದ ಒಂಜಿ ಬಾಕಿಲ್ ದೆತ್ತ ತೂನಗ ನರಮಾನಿನ ತರೆಕ್ಲೆನ್ ಸಾಲ್ಗ್ ನೇಲೆ ಪಾಡ್ ದೀತ್ಂಡ್.

ಆ ತರೆಕ್ಲು ಅಲೆನ್ ತೂದು ತೆಲ್ಪರೆ ಸುರು ಮಲ್ತ. ಆಲ್ ಕೇಂಡೊಲು, "ದಾಯೆ ತೆಲ್ಪುವರ್?"

"ಅಪಗಾಂಡ, ನಿನ ಲೆಕ್ಕನೆ ಎಂಕಲೆನ್ನಾ ಈ ರಕ್ಕಸೆ ಕೊಣತಿತ್ತೆ, ಮುಲ್ಪ ಎಂಕಲೆನ ವೈತ ಮಾಸ ತಿಂದಾದ್, ನರಂಬುದ ನೆತ್ತೆರ್ ಪರ್ದ್ ತರೆ ಕಡ್ತಾದ್ ಇಂಚ ಅಕ್ಕಾಡ್ ದೀಯೆ. ನಿನನ್ನಾ ಇನಿ ಅಂಚೆನೇ ಮಲ್ಪೆ. ಅಯ್ಕ ನಿನ್ನನ್ ತೂದು ತೆಲಿಕೆ ಬತ್ತಂಡ್" ಪಂಡ.

"ರಾಮ್ ಬತ್ತಂಡೇ ಕಷ್ಟಾ"ಂದ್ ಆಲ್ ಬೀಗದ ಕೈ ಅಲ್ಪನೆ ಅಡಕ್ಕಿಯಲ್. "ದಾನೆ ಮಲ್ಪುನೇ" ಇಂದ್ ಆಲಚನೆಗ್ ಬೂರ್ಯಲ್. ಅಪಗ ಒಂಜಿ ತರೆ ಪಾಪ ತೋಜಿದ್ ಅಲೆಡ ಪನ್ಂಡ್, "ಇಂದಾ, ಅಲ್ಪ ಇಲ್ಲ ಕಡಿಟೊಂಜಿ ಅತ್ತಸದ ಮರ ಉಂಡತ್ತಾ, ಅಯ್ತ ಮಾಟೆಡ್ ಪೋದು ಈ ದೆಂಗ್ಡ್ ಕುಲ್ಲಾ. ರಕ್ಕಸೆ ಬನ್ನಗ ಈ ತೋಜೊಡ್ಡಿ. ಬೊಕ್ಕ ದಾದಾಪುಂಡು ತೂಕಾ"

ಆಲ್ ಅಂಚೆನೇ ಅತ್ತಸದ ಮರತ ಮುದೇಲ್ಗ್ ಪೋಯೊಲು. ಮರಕ್ ಮೂಜಿ ಸುತ್ತು ಬತ್ತೊಲು. ಮರತ ಪಿರ ಮೆಯ್ತ ಮಾಟೆದುಲಯಿ ನೂರ್ದು ದೆಂಗ್ಡ್ ಕುಲ್ಪಲ್.

ಈತಾವರೆಜ್ಜಿ ರಕ್ಕಸೆ ನಿಜ ರೂಪೊಡು ಬತ್ತೆ. ಉಲಾಯಿ ಬುಡೆದಿ ತೋಜಂದಿನ ತೂದು, 'ಓಡೆ ಪೋಯಾಂದ್' ಲೆತ್ತೆ. ಮೊಲೆಗ್ ಕೇನೊಂಡು, ಮನಿತಜಲ್. ಆರಬಟ ಕೊರ್ಪೆ. 'ಎಂಕ್ ಬಡವಾಪುಂಡು, ನಿನನೇ ತಿನ್ನೆ' ಇಂದ್ ಬಾಯಂಗಾವೊಂದು ಆಲೆನ್ ನಾಡುವೆ. ಪಿದಾಯಿ ಪಾರ್ ಬರ್ಪೆ.



ಈತಾನಗ ಕುಲೊಂದಿನವುಲೇ ಆಲ್ ದೇವರೆನ್ ನಟ್ಟುವಲ್, "ಓ ದೇವರೇ, ಯಾನ್ ಸತ್ಯೊಡು ಪುಡುದು, ದವೊಡು ಬಲತ್ತಿನಾಲ್ ಅಂದಂದಾಂಡ ಎನ್ನ ಪಾಸಾಡಿದ ಆನೆದ ಕಿನ್ನಿಲು, ನಾಯಿಲು ಬತ್ತಂದಾಂಡಲ ಎನನ್ ಕಾಪಡ್"

ಈತ್ ಆಲ್ ಎನ್ನರಿಜ್ಜಿ, ಅಂಚಿಡ್ಡ್ ಕೈಕಂಜಿ ಮೇಪುನ ಆಣ್ ಒರಿ ಆನೆದ ಬೆರಿಟ್ ಕುಲೊಂದು ಓಂಟೆ ಉತೊಂದು ಬರ್ಪೆ. ಆಯನ ಪಿರಾವುಡೆ ಕೈಕಂಜಿಲು, ನಾಯಿಲು ಬರ್ಪೆ.

ರಕ್ಕಸೆ ಆನೆನ್ನಾ, ಆನೆದ ಮಿತ್ತ್ ಕುಲ್ಲಿನಾಯನ್ನಾ ತೂದು, 'ಹಾಂ, ಇನಿ ನಿಕಲೆನೇ ತಿನ್ನೆ' ಇಂದಂದ್ ಆನೆದ ಕೈತಲ್ ಬಾಯಂಗಾವೊಂದು ಬರ್ಪೆ. ಅದಗ ಆನೆದ ಮಿತ್ತ್ ಕುಲ್ಲಿನ ಕೈಕಂಜಿ ಮೇಪುನಾಯೆ ನೋಟ ದೀದ್ ರಕ್ಕಸನ ಕಣ್ಣ್ಗ್ ಪಗರಿ ಬುಡ್ಡೆ.

ರಕ್ಕಸನ ರಡ್ಡ್ ಕಣ್ಣ್ಲಾ ಪುಡಾದ್ ರಂಬಾರೊಟಿ ಆಪುಂಡು. ನಾಯಿಲು ಬತ್ತದ್ ರಕ್ಕಸನ ಮೆಯ್ತು ಮಿತ್ತ್ ಲಾಗಿದ್ ಆಯನ್ ಬಿಚ್ಚಾದ್ ಪಾಡುವ. ಆನೆ ಬತ್ತದ್ ರಕ್ಕಸನ ತರೆ ದೊಂಕೊಂಡು. ರಕ್ಕಸೆ ನೆತ್ತೆರ್ ಕಕ್ಕಾದ್ ಅಡೇನೇ ಸೈಪೆ.

ಪೊಣ್ಣು ಮಾಟೆಡ್ಡ್ ಪಿದಾಯಿ ಬರ್ಪೊಲು. "ಈ ಏರ್ ದಾದಂದ್ ಕೈಕಂಜಿ ಮೇಪುನ ಆಣ್ ಕೇನುವೆ. ಆಲ್ ಪನ್ನೊಲು. ಅಲೆನ್ ದೆರ್ತದ್ ಆನೆದ ಮಿತ್ತ್ ಕುಲ್ಲಾವೆ. ಆನೆ ಅಕಲೆನ್ ಅಲೆನ ಅಮ್ಮೆ ಅರಸುಲ್ಲ ಅರಮನೆಗ್ ಲೆತೊಂಪೊಪುಂಡು.

"ಎನ ಮಗಲ್ಲ ಜೂವ ಒರ್ತತ್ತಾ, ನಿಕ್ಕ ಎನ ಮಗಲೆನ್ ಮದ್ಮೆ ಮಲ್ತ್ ಕೊರ್ಪೆ" ಇಂದ್ ಅರಸು ಆ ಕೈಕಂಜಿ ಮೇಪುನ ಆಣ್ಗ್ ತನ ಮಗಲೆನ್ ಮದ್ಮೆ ಮಲ್ತ್ ಕೊರ್ಪೆ. ಬೊಕ್ಕ ಅಕುಲು ಸುಕೋಟುಪ್ಪುವೆರ್.

○ ಕತೆ ಪಂಡಿನಾರ್ : ಶ್ರೀ ಕರಿಯ, ಕೇಪು ಗ್ರಾಮ

ಬಾರೆ ಪಂದೆದಿ

ಮಲಾರಗುತ್ತುಡು ಮೂವೆರ್ ತಗೆಲ್ಲೆಗ್ ಒರ್ತಿಯೇ ತಂಗಡಿ. ಬಾರೆ ಪಂದೆದಿಂದ್ ಅಲೆನ ಪುದಾರ್. ಚೊಂಬುದ ಗಿಂಡೆದಲ್ಕ ಎಡೇನ ಪೊರ್ಲೆದಿ ಪೊಣ್ಣು. ಮಲಾರ ಬೂಡುದ ಸಂಪೊತ್ತು ಪದ್ಮೆಯಿ ಬಂಗಾರ್ಗ್ ಗಡಿ ಮಿತ್ತ್ ಇತ್ತಜಿ, ಬಾರಿ ಮಲ್ಲಕುಲು.

ಇವೆರ್ ತಗೆಲ್ಲು ಬೇತೆ ಇಲ್ಲಾ ಬದ್ಕೆ ಮಲ್ತೆರ್, ಮದಿಮೆ ಮಸಿರಿ ಆಯೆರ್. ಮಲಾರ ಪಂದೆರ್ ಒರಿ ಇಪ್ಪೆದರ್. ತಂಗಡಿ ಬಾರೆ ಪಂದೆರ್ದಿನ್ ಕೊಂಡಾಟೊಡೇ ಸಾಂಕ್ದ್ ಮಲ್ತೆ ಮಲ್ತೆರ್. ಆಲ್ ಪೊಣ್ಣು ಪೋದು ಪೊಂಜೊವಾಯೊಲು. ಮಟ್ಟಾರ ಬೂಡುದ ಪೋದು ಸಾಟ್ ಆಂಡ್. ಬಾರೆ ಪಂದೆರ್ದಿನ್ ಮಟ್ಟಾರ ಬೂಡುಗು ಬಿದ್ ಬಲ್ಮಾಣೊಡು ಮದಿಮೆ ಮಂಗಿಲ ಮಲ್ತೆ ಕೊರ್ಯೆರ್. ತಗೆ ಮಲಾರ ಪಂದೆರ್ಗೆಲಾ ಮದ್ದೆ ಆಂಡ್. ಅಣಾನಂದ ದೂವಲ್ ಪಂದೆರ್ದಿ ಅರೆ ಬುಡೆದಿ ಆದ್ ಬತ್ತೊಲು.

ಮಟ್ಟಾರ ಬೂಡುದ ಮೈಂದ ಎಗ್ಗಡೆಗ್ ಕೈದಾರೆದ ಬುಡೆದಿ ಆದ್ ಬಾರೆ ಪಂದೆರ್ದಿ ಅರ್ತಿ ಪಿರ್ತಿಡೇ ದಿನ ಕಲೆಯೊಂದಿತ್ತೊಲು. ವರ್ಸ ಕರಿದ್ ಒರ್ಸ ಬತ್ತಂಡಲಾ ಬಾರೆ ಪಂದೆರ್ದಿಗ್ ಬಂಜಿ ಬತ್ತಜಿ. ಪಟ್ಟ ಪರಕೆ ತೂಕೆ ಬರ್ಕೆ ಮಾತ ಆಂಡಲಾ ಬಂಜಿ ಬತ್ತಜಿ.

ನಿರೆ ಕರೆಟ್ ಒಂಜಿ ಬಾಲೆ ಪುಟಿನೆನ್ ಬಾರೆ ಪಂದೆರ್ದಿ ತೂವರೆಂದ್ ಪೋಯೊಲು. ಮೋಲು ಅಡೆಗ್ ಪೋವರೆಜ್ಜಿ. ಅಲ್ಪ ಸೇರ್ದಿನ ಪೊಂಜೊವು ಮೋನೆ ಪೀಂತಾವೊಂದು ಬಾಲೆನ್ ಮದೆಕ್ ಕೊನೊಯೆರ್. "ಮಂಜ ಮರಡೆ ಬತ್ತೊಲು. ಬಾಲೆ ತೋಜಾವಡೆ" ಇನ್ನೆರ್. "ಗೊಡ್ಡು ದಡ್ಡೆ, ಬಾಲೆಗ್, ಪೆದ್ಮೆದಿಗ್ ನಿನ್ನ ಸೋಂಕು ಆವು. ಈ ಮುಟ್ಟು ಬರಡೆ" ಇಂದ್ ಪೊಂಜೊವು ಅಲೆನ ಮಾನ ಕಲೆದ್ ಕಡಪುಡ್ಯೆರ್.

ಬಾರೆ ಪಂದೆರ್ದಿ ಅವೆನ್ ಕೇನಿಗಿನ ಏಲೇಲ್ ಲೋಕ ತೋಜಿದ್ ಸೆರಂಗ್ ಬಾಯಿದಡ್ ಪಸ್ದ್ ಬುಲೊಂದು ಮಟ್ಟಾರ ಬೂಡುಗು ಪಿರ ಬತ್ತೊಲು. ಅಡ್ಡಿಲ್ಲದ ಕಣಕ್ದ ಕೋಡಿಗ್ ಕತ್ತಲೆಡ್ ಪೋದು ಕಂಕಣೆ ಜೆಸೊಂಡೊಲು.

ಏರಾಯಿ ನೀರ್ ಏರಾರೆ ತಗ್ಗಾಯಿನೀರ್ ತಗ್ಗರೆ ಪೋತಿನ ಅಲೆ ಕಂಡನೆ ಮಟ್ಟಾರ ಪಂದೆರ್ ಬತ್ತೆರ್. ಇಲ್ಲ ಕಡಿತ ಮುಟ್ಟು ಕಲ್ ಮಿತ್ತಾದ್ ಉಲಾಯಿ ಬತ್ತಂಡಲಾ ಬುಡೆದಿ ಬಾರೆ ಪಂದೆರ್ದಿ ಓಲ್ಲಾ ತೋಜುಜೊಲು. ನಾಡಿಯೆರ್.

"ಪಂದೆರ್ದಿಯೇ, ಈ ಓಲುಲ್ಲ. ಚಾವಡಿಡ್ ಗಿಂಡೆಡ್ ಪೇರ್, ಪಿಂಗಾಣೊಡು ಪಂದೆರ್ ದೀದ್ ಈ ಒಡೆ ಪೋಯ" ಇಂದ್ ಬಾರಿ ನಾಡ್ಯೆರ್. ನಾಡ್ನಗ ಓಲ್ಲಾ ಇಜ್ಜೊಲು. ಕಣಕ್ದ ಕೋಡಿಡ್ ಕತ್ತಲೆಡ್ ನಾಡ್ನಗ ಅಲ್ಪ ಕಂಕಣೆ ಜೇದಿನವು ತೋಜಿಂಡ್.

"ಅಂದಯಾ, ನಿಕ್ಕ ದಾನಿ ಆಂಡ್? ಈ ಜೇಯಿದಿನಿ ದಾಯೆ?"

ಆಲ್ ಮನಿಪಂದೆ ದುಕ್ಕಿದ್ ಬುಲೊಲು.

ಆರ್ ಕುಡ ಕೇಂಡೆರ್, "ಪಂದೆರ್ದೇ, ದಾದಂಡ್ ನಿಕ್ಕ ಪಣ್?"

ಬಾರೆ ಪಂದೆದಿ, "ಯಾನ್ ನಿರೆಕರೆಕ್ ಪೋಯೆ ಆಣ್ಣೋವೇ, ಬಾಲೆ ತೂವರೆಂದ್ ಪೋನಗ, ನಿಕ್ ಕೆನ್ನಿಡ್ ಪಂದರ್, ಪಣ್ಣೆನರೆ ಕೊಡಿದಾಂಡ್ ಆಂಡಲಾ ಬಂಜಿ ಬರಂದಿ ಗೊಡ್ಡುದಡ್ಡೆ, ಬಾಲೆ ತೂವರೆ ಬತ್ತೊಲು, ಬಾಲೆನ್ ತೂಪಾವುಜಿ" ಇಂದ್ ಮಾತೆರ್ಲ ಎನ ಮಾನ ಗೆತ್ತೆರ್ ಇಂದ್ ಬುಲಿತೊಲು.

"ಅಂದಾ, ಈ ಬುಲಿಪಡ" ಇಂದ್ ಸಮದಾನ ಪಂಡೆರ್.

ಅಪಗ ಬಾರೆ ಪಂದೆದಿ ಪಣ್ಣೊಲು "ಎನ್ನ ಮಲ್ಲಾರ ಬೂಡುಗು ಪೋವೊಡು ಪಂದೆರೆ, ಅಣ್ಣೆರಾದ್ ಬತ್ತಿನಿಜ್ಜಿ, ನಮಾದ್ ಪೋಯಿನಿಜ್ಜಿ, ಅಂಚೆನೇ ಎನ್ನ ಮೂಲದಡೆಗ್ ಎಂಕ್ ಪೋವೊಡು" ಆವು ಪೋಯಿಂದೆರ್ ಪಂದೆರ್.

ಆವುನ್ನಗ, ಆಲ್ ಬಂಗಾರ್ದ ತೌತೆ, ಬೊಲ್ಲಿದ ಪಂದರ್ ಪರತೆ ಕಟೊಂಡೊಲು. ಬಂಗಾರ್ ಪದ್ದೆಯಿ ಕಲೆಂಬಿಡ್ ಕಟ್ ದೀಯೆರ್. ನಾಲ್ ಸುತ್ತ ಬೂಡುಗು ಬಾಕಿಲ್ ಪಾಡ್ಯೆರ್. ಕಂಡನೆ ಬುಡೆದಿ ಇರ್ವೆರಪ್ಪ ಪಿದಾಡ್ ಮಲ್ಲಾರ ಬೂಡುಗು ಬತ್ತೆರ್.

ಮಲ್ಲಾರ ಬೂಡುಗು ಪೋನಗ, ಅಲ್ ಅಲೆನ ತಗೆ ಮಲ್ಲಾರ ಪಂದೆರ್, ತೂಂಕುಪಾಡಿ ಉಜ್ಜಾಲ್ಡ್ ಕುಲ್ಲುದು ತೂಪೆರ್. ತಂಗಡಿನ್ನಾ, ಬಾವನ್ನಾ ತೂಯಿನೇ, "ಓಹೋ ಯಾನಾದ್ ಪೋಯಿನಿಜ್ಜಿ, ತಂಗಡ್ಯಾದ್ ಇನಿ ಮುಟ್ಟು ಬತ್ತಿನಿಜ್ಜಿ, ಪೋಪೆನ್ನಾಗ ಎನ ಬುಡೆದಿ ತಡೆತ್ತ ಪತಿಯೊಲು. ಇನಿ ಎನ ತಂಗಡಿ ಇಲ್ಲ ಬಾಕಿಲ್ಗ್ ಬತ್ತೊಲೇ" ಇಂದ್ ಲಕ್ದ್ ಎದೊನರೆ ಪೋಯೆರ್, ಏರ್? ತಗೆ.

ಮಲಾರ ಪಂದೆರ್ ಲಕ್ದ್ ತನ ಟುವಲೊಯ್ತೆರ್, ತಂಗಡಿನ ಮೋನೆ ಒಚ್ಚಿಯೆರ್. ಬಾವನ್ ಪಾತೆರ್ಪಾದ್ ನೀರ್ ಕೊರ್ಯೆರ್. ಲೆತೊಂಬತ್ತ್ ಕುಲ್ಲಾಯೆರ್.

ಕುಲ್ಲಾಗಿನೇ, ಉಲಯಿಡ್ ತೂಯಿನ ಮಲಾರ ಗುತ್ತಿನಾರೆ ಬುಡೆದಿ ಅಣನಂದ ದೂವಲ್ ಪಂದೆದಿ ಕಟಕಟ ಪರು ಕಡೆಯೊಲು, "ಆಂಡ, ಬತ್ತಂಡ ನನ ಮಟ್ಟಾರ ಬೂಡುದ ಚಟ್ಪ್ ಬತ್ತಂಡ" ಇನೊಂದು ಮುಣು ಮುಣುಂದೊಲು.

ಅವೆನ್ ಕೇನ್ಯ ಪಂದೆರ್, "ಅಂದಯಾ, ಈ ಮನಿಪಡ. ಎನ ತಂಗಡಿ ಬಾರೆ ಪಂದೆದಿ ಅಪ್ಪಮ್ಮನ ಸಾವುಗು ಬೋದಿನಾಲ್, ಅವೆಡ್ ಬೊಕ್ಕ ಇಂಚಿ ತರೆ ಪಾಡ್ಡಿನಾಲತ್ತ. ಈ ಪಾತೆರಡ ಎಂಕಲೆಗ್ ಮೂವರೆಗ್ ಒರ್ತಿ ತಂಗಡಿ ಉಪ್ಪುನಾಲ್ ಆಲ್" ಇಂದ್ ಪಂಡಲಾ ಆಲ್ ಕೇನಂದೆ ಸುಡು ಸುಡುಂದ್ ಪನೊಂದೇ ಉಲ್ಲೊಲು.

'ಅಪಗ, ದಾನಿ ಬತ್ತಿನಿ?' ಇಂದ್ ತಂಗಡಿನ ಪಂದೆರ್ ಕೇಂಡೆರ್. ತಂಗಡಿ ನಿರೆ

ಕರೆಟ್ ತಾನ್ ಪೋಯಿನದಗ ನಡತಿನೆನ್ ಪಂಡೊಲು. "ಅಣ್ಣೆರೇ, ನಮ್ಮ ಮೂಲ ಓಲು ಅಣ್ಣೆರೇ?" ಇಂದ್ ಕೇಂಡೊಲು.

"ಅಪಗ ಕುಡುಪು ಕಲ್ಲುಕಲ್ಲನ ದೇತನೊಡು" ಇಂದೆರ್.

"ಅಣ್ಣೆರ್, ನಂಕ್ ಅಡೆಗ್ ಪೋವೊಡತ್ತೆ, ಯಾನ್ ಪರಕೆ ಪತೊಂಬೈದೆ ಅಡೆಗ್" ಇನ್ನೊಲು ಬಾರೆ.

"ಎಂಚಿನ ಪರಕೆ?"

"ಬಂಗಾರ ತೌತಲ, ಬೊಲ್ಲಿದ ಪಂದ್‌ಲಾ ಕನದೆ"

ಆವುಂದೆರ್, ಮಲಾರ ಪಂದೆರ್ ದುತ್ತೆತ ಪಾಡೊಂಡೆರ್. ಉಂದೆನ್ ತೂಯಿನ ಅರೆ ಬುಡೆದಿ ದುವಾಲ್ ಪಂದೆದಿ ಮಚ್ಚೆರೊಡು, "ಹಾಂ ಆಂಡಾ, ನನ ಮಲಾರ ಬೂಡುನು ಕಬ್ಬೆ ದೀವರೆ ಮಂಜ ಮರಡೆ ಪಿದಾಡ್ಲೊಲಾ?" ಇಂದ್ ಕಿಚ್ಚಿ ಪಾತೆರೊಲು.

ಪಂದೆರ್, "ಅಂದಾ, ಅಪೂರ್ವೊಡು ಬೋದಿನಕುಲು, ಎನ ಮರ್ಯಾದಿ ಈ ಒಪ್ಪಲಾ. ಎಂಕುಲು ಪರಕೆ ಪಾಡರೆ ಪೋದು ಬರ್ಪ. ಈ ಅಟಲ್ ಅರಗಣೆ ಮಲ್ತ ದೀಲ" ಇಂದ್ ಪಂಡ್‌ದ್ ಜೋಡು ಪಾಡೊಂದು, ಮೂವೆರಪ್ಪ ಪೋಪೆರ್.

ಬತ್ತೆರ್, ದೇವಸ್ತಾನ ಸುತ್ತ ಬತ್ತೆರ್. ಹಣ್ಣ್ ಕಾಯಿ ಮಲ್ಪಾಯೆರ್. ಪರಕೆ ಒಪ್ಪಾಯೆರ್.

"ಎನ ತಂಗಡಿ ಒರ್ಸಾದ್ ಕುಲ್ಲೊಡು, ತಿಂಗೊಲಾದ್ ಪೆದೊಡು. ಎನ ತಂಗಡಿಗ್ ಗುರ್ತ ತೂಪಾವರೆ ಸಂತಾನ ಕೊರ್ಲೆ"ಂದ್ ಕೈ ಮುಗೈರ್.

ಪಿರ ಪಿಜಿದ್ ಬನ್ನಾಗ ತಂಗಡಿ ಪಂದೆದಿಗ್ ನಡು ತಾದಿಡ್ ಪಿದಾಯಿ ಆಂಡ್. ಬೂಡು ದೂರ, ಮುಂದಿಲ್ ಮುಟ್ಟು ಆಂಡ್. ಏರ್ ತಗ್ಗ್ ಮಿತ್ತಾನಗ ಮೋಲು ಬಾರೆ ಪಂದೆದಿಗ್ ಸಂಕಟ ತಡೆಯೆರೆ ಆಪುಜಿ, ಪಣ್ಣೊಲು, "ಅಣ್ಣೆರೇ, ಯಾನ್ ಬೂಡುಗು ದೂರಾಯೆ, ಮುಂದಿಲ್‌ಗ್ ಮುಟ್ಟು ಆಯೆ"

ಮೆರೆಗ್ ಕೇನ್ನಿನೇ ಐಸ್ರ ಆಂಡ್. "ಓಹೋ ತಂಗಡಿ ಬಂಜಿನಾಲಾಯೊಲೇ" ಇಂದ್ ಬೂಡುಗು ಬತ್ತೆರ್. ಬೂಡು ಮುಟ್ಟಾಕಿನೇ ಬಾರೆ ಪಂದೆದಿ ತನ ಮೈತಿದಿನ್ ಲೆತ್ತೆದ್ "ಅಕ್ಕೇರೇ, ಎಂಕೊಂಜಿ ಕುಂಟು ಕೊರ್ಲೆ" ಇಂದ್ ಕೇಂಡೊಲು. ಮೈತಿದಿ ನೀರುಪ್ಪಡ್‌ಗ್ ಕಟಾದಿನ ಒಂಜಿ ಕುರೆಪ್ಪಟ್ ಕುಂಟುನು ಒಯ್ತ ಕೊರ್ಯೊಲು.

ಅವೆನ್ ಆಲ್ ಮಲ್ಲಾಲ್ ತುತ್ತುನಾಲಾ, ಒಯ್ತ ಅಂಚಿ ತಾದಿಗ್ ದಕಿಯೊಲು. ಅಣ್ಣೆರೆಡ, "ಅಣ್ಣಾ, ಎಂಕೊಂಜಿ ತುಂಡು ಕುಂಟು ಕೊರ್ಲೆ, ಒಂಜಿ ಕಡ್ಯ ನೀರ್ಗೆತ್ತ ಕೊರ್ಲೆ" ಇಂದ್ ಪಂಡೊಲು. ಆರ್, "ಅಪಗ ನಿನ ಮೈತಿದಿ ಕೊರ್ಲೆಲಾ ಮಗಾ" ಇಂದ್ ಕೇಂಡೆರ್.

"ಮೈತಿದಿ ಕೊರ್ಲೆರ್, ಅಲೇ ಆ ಒಂಜಿ ಪರಪಟ್ ಕುಂಟು ಕೊರ್ಲೆರ್" ಇಂದ್ ತೋಚಾಯೊಲು. ಪಂದೆರ್ ತನ ಪುಗಲ್ಲೆ ಬೈರಾಸ್ ಒಯ್ತೆರ್. ಅವೆನ್ ರಡ್ಡ್ ಬಾಗ ಮಲ್ತೆರ್, ತಂಗಡಿಗ್ ಕೊರ್ಲೆರ್. ಉಗ್ಗಲ್ಡ್ ಒಂಜಿ ಕಡ್ಯ ನೀರ್ ಗೆತ್ತ ಕೊರ್ಲೆರ್. "ಕೈಕಾರ್ ದೆಕ್ಕಲಾ ಮಗಾ, ಮೀಯೊಂದುಪ್ಪುಲಾ" ಇಂದೆರ್. ಇಲ್ಲದಲಾಯಿ ಪೋಯೆರ್. ಬುಡೆದಿಡ, "ಅಟಲ್ ಆಂಡ ಪಂದೆರ್ದೇ, ಒಣಸ್ ಬಲಸಾಲ" ಇಂದೆರ್.

ಅರೆ ಬುಡೆದಿ ಒಣಸ್ ಬಲಸೊಲು. ತಗೆಕ್ಲಾ, ಕಂಡಾನಿಗ್ಲಾ ಚಾವಡಿಡ್ ಮಣ್ ದೀದ್ ಎಡ್ಡೆ ಮಲ್ತ್ ಬಲಸೊಲು. ಮೈತಿದಿಗ್ ಉಲಯಿ ಮೂಜಿ ದಿನತ ಪುಲ್ಟಟ್ ತಂಞನಲಾ, ಒಂಜಿ ತೇವುದ ಮುಂಡೊಡು ಕುಕ್ಕುಲಾ ಕೊರ್ಲೆರು.

ಮೋನೆ ದೆಕ್ದಾದ್ ಪಂದೆರ್ ತಂಗಡಿಡ, "ಉಂಡನ ಮಗಾ, ನಿನ ಮೈತಿದಿ ಪಾಡೊಲಾ?" ಇಂದ್ ಕೇಂಡೆರ್. ಅರೆಗ್ ಗೊತ್ತುಜ್ಜಿ, ಆಲ್, "ಉಂಡೆ ಅಣ್ಣೆರೇ, ಬಾರೀ ಲ್ಯಾಕ್ದ ಒಣಸ್ ಎನ ಮೈತಿದಿ ಎಂಕ್ ಬಲಸಿಯೆರ್" ಇಂದ್ ಪಣ್ಣಿಗ ಅಲೆಗ್ ಕೊಡಿ ಕಣ್ಣೆಡ್ ಕಡೆದುಕ್ ಬತ್ತಂಡ್.

ತಗೆಕ್ ಅಂದಾಜಿ ಆಂಡ್. ತಂಗಡಿನ ತೋಲಾರ ತಟಿಯೆರ್, ಬಾಯಾರ ಬುಲಿತೆರ್. "ಇನಿ ಎನ ಅಪ್ಪೆ ಇತ್ತಂಡ ಏತ್ ಮಲ್ಲ ಸನ್ನಾಯ ಸಂತೋಸ್ ಇತ್ತದು, ಅಪ್ಪೆರ್ ಕಾಯ ಬುಡ್ಡು ಪೋವೊಡಾಂಡ್, ನಿಕ್ಕು ಈ ಕಷ್ಟ ಬರೊಡಾಂಡ್, ಮಲ್ಲೆ ಇಜ್ಜಿ, ಮಗಾ ಈ ನನ ಪೋಲ" ಇಂದೆರ್.

ಅಕುಲು, ಬಾರೆ ಪಂದೆರ್ದಿಲಾ ಅಲೆ ಕಂಡನೆ ಮಟ್ಟಾರ ಪಂದೆರ್ಲಾ ಅಲ್ಟ ಪಿದಾಡ್ ತನ್ಕಲೆ ಮಟ್ಟಾರ ಬೂಡುಗು ಬತ್ತೆರ್, ಬೂಡುಡು ಅಟಲ್ ಮಲ್ತ್ ಉಂಡೆರ್. ಆನಿದ ದಿನ ಕರಿಂಡ್.

ಬಾರೆ ಪಂದೆರ್ದಿಗ್ ಬಂಜಿಡ್ ನೀರುಂತ್ಂಡ್. ತಿಂಗೊಲಾನಗ ಮೋಲು ತಗೆಕ್ ಓಲೆ ಬರೆಪಾಯೊಲು, "ಅಣ್ಣೆರೇ, ಈರೊರ ಬತ್ತ ಪೋವೊಡು" ಇಂದ್. ಆಂಡ ಆರೆನ್ ಅರೆ ಬುಡೆದಿ ಓಲು ಬರೆ ಬುಡೊಲು? "ಈರ್ ಪೋರ್ಯರ್ಡ ಇರೆ ಬೂಡುನು ಕಾಪರೆ ಎಂಕ್ ಸಾಧ್ಯಜ್ಜಿ. ನಾಲ್ ಸುತ್ತ ಬಾಕಿಲ್ ಪಾಡ್ ಪೋವೊಡಾವು" ಅಂಚ ಪಂದೆರ್ ಪಿದಾಡುಜೆರ್.

ಒಂಜಿ ತಿಂಗೊಲಾಂಡ್. ರಡ್ಡ್ ತಿಂಗೊಲಾಂಡ್. ಐನ್ ತಿಂಗೊಲಾನಗ ಬಾರೆ ಪಂದೆದಿ ಕಾತ್ ಕಾತ್‌ದ್ ಕುಡ ಒಂಜಿ ಓಲೆ ಬರೆಪಾಯೊಲು, "ಅಣ್ಣೆರೇ, ಈರ್ ಬತ್ತಜರ್, ಮಲ್ಲೆಜ್ಜಿ. ಆಂಡ ಮಲ್ಲಾರ ಬೂಡುದ ಒಂಜಿ ತುಂಡು ಪೂ ಮುಡ್ಪರೆ ಎಂಕ್ ದಿಂಜ ಅಪಾಸಿಗೆ ಉಂಡು. ಎನನ್ ಬತ್ತದ್ ಲೆತೊಂಪೋಲೆ. ಯಾನ್ ಕಾಂಡೆ ಬತ್ತದ್ ಬಯ್ಯಡ್ ಪಿರ ಬರ್ಪೆ, ಒಂಜಿ ನೀರನುಪ್ಪುಡೆ ಕೈದೆಕ್ಕಾಲೆ ಅಣ್ಣೆರೇ"

ತಗೆಕ್ಕು ಓಲೆ ತೂದು ಬಾರೀ ಐಸಿರಾಂಡ್. "ಓಹೋ ಎನ ತಂಗಡಿ ಬಂಜಿನಾಲ್, ಓಲೆ ಬರೆಯೊಲು, ಆಂಡಲಾ ಯಾನ್ ಇನಿ ಮುಟ್ಟು ಪೋಯಿನಿಜ್ಜಿ, ಇಸೆ ಪೋದು ಲೆತೊಂಬರೊಡು" ಇಂದ್ ಪಣ್ಣಗ ಆಲ್, ದುವಾಲ್ ಪಂದೆದಿ ಬುಡ್ಪುಜೊಲು, "ತೆಕ್ಕು, ಲೋಕೊಡು ಇರೆಗೇ ಒರ್ತಿ ತಂಗಡಿ ಉಪ್ಪುನಾ, ಯಾನ್ ಇರೆನ ಬೆರಿ ಪೂಜೆರೆ ಇಜ್ಜೆನಾ, ಪಿರವುಗು ತೂವರೆ ಇಜ್ಜೆನಾ, ತಂಗಡಿ ಇರೆಗೇ ಉಪ್ಪುನಾ, ಎಂಕ್ ತಗೇಕ್ಕು ಇಜ್ಜೆರಾ?" ಆಂಡ್, ಪಂದೆರ್ ಅಡೆಗೇ ಕುಲ್ಲಿಯೆರ್.

ಅಲ್ಪ, ಬಾರೆ ಪಂದೆದಿ ಕಾತೊಲು, ಅಣ್ಣೆರ್ ಬತ್ತಜೆರ್. ಆಜಿ, ಏಲ್, ಎಣ್ಣು ತಿಂಗೊಲಾಂಡ್. ಪಿರ ಒಂಜಿ ಓಲೆ ಬರೆಯೊಲು, "ಅಣ್ಣೆರೇ, ಮಟ್ಟಾರ ಬೂಡುದ ಎಗಡ್ರು ಎನ ಕಂಡನೈ ಕೊರ್ಪಿ ಮಯ್ಯಾಡ್ಲಿದಿನ್ ಈರ್ ಬತ್ತ ಕೈ ಒಯ್ಯದ್ ಗೆತೊನೊಡು, ಕೂಡ್ಲೆ ಬಲ್ಲೆ" ಅಯ್ಯಾಲಾ ಮೈತಿದಿ ಮುಲ್ಪ ಪೋರೆ ಬುಡೊಲು.

ಅಲ್ಪ ಮಟ್ಟಾರ ಬೂಡುಡು ಊರು ಸೇರ್ದ್ ಬಾಯಿಕೆ ಆಂಡ್. ಎಡತ್ತಗ್ ಪೂ ಸೀರೆ ಕೊರ್ಯೆರ್, ಬಲತ್ತಗ್ ಪೋದು ಅಲೆ ಕಂಡನೆ ಮೈಂದೆಗ್ಗಡ್ರು ಪೂ ಸೀರೆ ಗೆತೊಂಡೆರ್. "ಮಲ್ಲೆತ್ತ ನಿಕ್ಕು ಕಂಡನೆಲಾ ಯಾನೇ, ಪತ್ತಿಲ್ಲೆಲಾ ಎನ್ನವೇ ಇಂದ್ ಎನ್ನಲಾ ಪಂದೆದೇ" ಇಂದ್ ಬುಡೆದಿಗ್ ಸಮಾದಾನ ಪಂಡೆರ್.

ಪತ್ತೆ ತಿಂಗೊಲಾದ್ ಬೇನೆ ಸುರುವಾಂಡ್. ಬಾರೆ ಪಂದೆದಿಗ್ ಆಸೆ ಉಪ್ಪುನು ಮಲಾರ ಬೂಡುದವೇ, ಅಪ್ಪೆಲ್ಲದ ಒಂಜಿ ತುಂಡು ಪೂ ಮುಡೊಡು, ನೀರ ನುಪ್ಪುಡು ಕೈ ನನೆಪೊಡು ಇಂದ್. ಆತ್ ಪೂರ್ತಾನಗ ಮೈಂದ ಎಗ್ಗಡ್ರೇ ಮಲಾರ ಬೂಡುಗೊಂಜಿ ಓಲೆ ಕಡಪುಡೈರ್, "ಇರೆ ತಂಗಡಿಗ್ ಬೇನೆ ಬರ್ಪುಂಡು, ಬಾಯಕೆದ ಓಲೆಗ್ಲಾ ಈರ್ ಬತ್ತಜರ್. ಇತ್ತೆ ಇರೆ ತಂಗಡಿ ಜೂವೊಡು ಒರಿವೊಲಾ ಇಜ್ಜಾ ಗೊತ್ತುಜ್ಜಿ. ಉಂದು ಸಾವುದ ಓಲೆಂದ್ ಎನ್ನಲೇ, ಕಣ್ಣ್ಡ್ ತೂವರೆ ಇತ್ತಂಡ ಬಲ್ಲೆ"

ಅವೆನ್ ಓದಿನೇ ಮಲಾರ ಪಂದೆರ್ ದಿಡೀಲ ಮಗ್ಗೆಯೆರ್. "ಓಹೋ, ನಿನ ಪಾತೆರ ಕೇಂಡೆ, ಇನಿ ಮುಟ್ಟು ಯಾನೆನ ತಂಗಡಿನ ತೂವರೆ ಕಣ್ಣ್ ಕೊನೊದು ಪೋಯಿಜಿ,

ನನ ಕುಲ್ಲುನತ್ತ, ಯಾನ್ ಪಿದಾಡಿಯೆ" ಇಂದ್ ಬುಡೆದಿಗ್ ಪಂಡೆರ್, ಪಾರ್ ಬತ್ತೆರ್.

ಬನ್ನಗ ಅರೆ ತಂಗಡಿ ಅಣ್ಣೆರ್ ಬತ್ತೆರಾ ಇಂದ್ ಕೇನೊಂದೇ ನೇಲೆದ ಬಲ್ಲಾಡ್ ನೇಲುಪೊಲು. ಮೇರೆ ಮುಟ್ಟು ಬತ್ತೆದ್ ಒರ್ಕಾಲೆ ಕೊರ್ದು ಉಂತಿಯೆರ್. ತಗೆನ್ ತೂಕಿನೇ ಬಾರೆ ಪಂದೆದಿ, "ಅಣ್ಣೆರೇ, ಎಂಕ್ ಅಪ್ಪೆಲ್ಲದ ಒಂಜಿ ತುಂಡು ಪೂ ಮುಡ್ಪು ಅಪಾಸಿಗೆ ಇತ್ತಂಡ್. ಆಂಡ ಎಂಕ್ ರುಣ ಇಜ್ಜಿ. ಇರೆಗ್ ಪುಣ್ಯ ಇಜ್ಜಿ. ಬತ್ತೆರಾ, ಎನ ಬೆರಿಟ್ ಕುಲ್ಲೆ" ಇಂದೊಲು ಕುದ್ದೆರ್.

ಆಲ್ ರಡ್ಡ್ ಪೊಣ್ಣು ಬಾಲ್ವೆನ್ ಬಿಜಿಲಿಯೊಲು. ಪದೆತ್ತಾಲ್ಲು ಪೂವೊಲು ಕುತ್ತುದು ಪಾಲೆಡ್ ಪಾಡ್ಪಾಯೆರ್.

ಬಾಲೆಲೆಗ್ 'ಉಲಯಿದ ಕರ್ನಗೆ, ಪಿದಯಿತ ಕರ್ನಗೆ' ಇಂದ್ ಪುದರ್ ದೀಯೆರ್. ಬಾರೆ ಪಂದೆದಿ ಪಣ್ಣೊಲು, "ಒರ್ತಿ ಉಲಯಿಡ್ ಎನ ತಗೆಕ್ ಅಟಲ್ ಅರಗಣೆ ಮಲ್ಪರೆ - ಉಲಯಿದ ಕರ್ನಗೆ, ನನೊರ್ತಿ ಅರೆಗ್ ಪಿದಾಯಿಡ್ ಬೆಂದ್ರೆ ಕ್ಯಾತ್‌ದ್ ಕೊರೆ, ಪಿದಯಿತ್ತ ಕರ್ನಗೆ" ಇಂದೊಲು ಬಾಲ್ವೆನ್ ತಗೆ ಕೈಟ್ ಪಾಡ್ಪೊಲು.

ಬೊಕ್ಕ ಪಂಡೊಲು, "ಮಲಾರ ಬೂಡ್ಡ ಜುಮಾದಿ ಉಲ್ಲೆನಾ, ಕಲ್ಲಾದ್ ಪೋಯೆನಾ?" ಆತ್ ಪಂಡಿನಾಲೇ ಬಡಕ್ಕ ಬೂರ್ದು ಪ್ರಾಣ ಬುಡ್ಪೊಲು. ಸೈಯ್ಯರಿಜ್ಜಿ, ತಗೆಲಾ, ಕಂಡನೈಲಾ ಅರ್ಡ್ ಮುರೆಡಿಯೆರ್, "ಅಯ್ಯ ಪಂದೆದೇ, ಎಂಕಲೆ ಕೈ ಬುಡ್ಡು ಪೋಯನಾ" ಇಂದ್ ಮಂಡೆ ಮಂಡೆ ದರ್ತೊಂಡೆರ್.

ಅಸಣಂದ ಬಾಕ್ಯಾರ್ಡ್ ಮಸಣಂದ ಕಾಟ ಗೂರ್ಯೆರ್. ಪುಣ ಪೊತ್ತಾಯೆರ್. ಪೋತು ಪೋಯಿ ಬೊಕ ದಾದ ಉಂಡು, ಮೇರ್ ತಮ್ಮಲೆ ಪಂದೆರ್, ಬಾಲೆಲೆನ್ ಅಂಚಿಡೊಂಜಿ ಸೆರಂಗ್‌ಡ್ ಇಂಚಿಡೊಂಜಿ ಸೆರಂಗ್‌ಡ್ ಪಾಡೊಂದು ಮಲಾರ ಬೂಡುಗು ಬತ್ತೆರ್.

ದೂವಲ್ ಪಂದೆದಿ ಉಂದೆನ್ ತೂಯಿನಾಲ್, "ಬತ್ತೆ ಪೋಂಡಲಾ ಬತ್ತೆ ಬತ್ತೆಂಡಾ, ಮಲಾರೆ ಬೂಡುನು ಆಳ್ಕರೆ ಸಂತಾನ ಕಣತ್ತರಾ?" ಇಂದೊಲು. "ಪಂದೆದಿಯೇ, ಕಿಚ್ಚಿ ಲಕ್ಕಾವಡಾ, ಆತ್ ಮೋಕೆದ ಎನ ತಂಗಡಿ ಪೋಯೊಲು. ಅಲೆ ಬಾಲೆಲೆನಾಂಡ ನಮ ಸಾಂಕ್‌ಗಾ" ಇಂದ್ ಸಮಾದಾನೊಡು ಪಂಡೆರ್.

ಬಾಲೆಲೆನ್ ಆಲ್ ಕಣ್ಣು ಕೊಡಿಟ್ ತೂಪುಜೊಲು. ಚಾಕಿರಿದ ಪೊಂಚೊವು ದೊಂಡೆಗ್ ಬಾಜೆಲ್, ಬಂಜಿಗ್ ಬಡವು ಕೊರ್ಯೆರ್. ಮಲಾರ ಪಂದೆರೆನ ತೂಕೆರಾಕೆಡ್ ಪೊಣ್ಣು ಜೋಕುಲು ತೂಕ್ಕ ನೀರ್‌ಗ ಅಂದಾಯಿಲೆಕ ಮಲ್ಲೆ ಆಪ. ರೂಪೊಡು ಐಸಿರ ತೋಜುವ.

ದುವಾಲ್ ಪಂದೆದಿ ಇತೆ ಜಬ್ಬು ಆಯೊಲು. ಉಲಯಿದ ಕರ್ನಗೆ ಉಲಯಿಡ್ ಅಟಲ್ ಅರಗಣೆ ಮಲ್ಪರೆ ಕೂಡುವೊಲು, ಪಿದಯಿತ್ತ ಕರ್ನಗೆ ಪಿದಯಿಡ್ ತಮ್ಮಲೆ ಪಂದೆರೆಗ್ ಬೆಂದ್ರ ಬೆಚ್ಚ ಮಲ್ಪುನ ಬೆಲೆಡುಲ್ಲೊಲು.

ಆತಾನಗ ಮಲಾರ ಬೂಡುಗೊಂಜಿ ದಂಡ್ ತೋಜಿಂಡ್. ಪಂದೆರ್ ಬುಡೆದಿಡ, "ಅಂದಯಾ ದಂಡ್ ತೋಜಿದ್ಂಡ್, ಯಾನ್ ದಂಡ್‌ಗ್ ಪಿದಾಡುವೆ. ಅಟಲ್ ಅರಗಣೆ ಮಲ್ಪುಲ" ಪಣ್ಣೆರ್. ಅದಗ ಆಲ್, "ಇನಿ ಇರೆನ ಮರ್ಮಲೆಡ ಅಟಲ್ ಮಲ್ಪಾಲೆ, ಯಾನ್ ಮಲ್ಪಯೆ" ಇನ್ನೊಲು.

ಉಲಯಿದ ಕರ್ನಗೆ ಅಟಲ್ ಮಲ್ಪುವೊಲು. ಆತಾನಗ ದುವಾಲ್ ಪಂದೆದಿ ಮೆಲ್ಲ ಪೋದು ಅಡ್ಡಿ ಬಾಜನೊಗು ಅಂಬಿದ ಬೆಜಂಟ್ ತರೆತ ಕೀಂತ್, ತಿಪ್ಪಿ, ಪೊಯ್ಯ ಕೊನೊದು ಬೆಯ್ಪಿ ಬಾಜನದುಲಯಿ ಪಾಡುವೊಲು.

ಪಂದೆರ್ ಒಣಸಗ್ ಕುಲ್ಲುವೆರ್. ಒಂಜಿ ಪುಂಡಿ ನುಪ್ಪು ಬಾಯಿಗ್‌ದೀನಗ ಪೊಯ್ಯೆಲಾ, ತರೆತ ಕೀಂತ್‌ಲಾ ತಿಕ್‌ಂಡ್. ಪಂದೆರೆಗ್ ಪಿಸರ್ ಬತ್ತಂಡ್, "ಅಂದಯೊ ಉಂದು ಏರ್ ಅಟಲ್ ಮಲ್ಪಿನಿ?" ಇಂದ್ ಕೇಂಡೆರ್.

ಅರೆ ಬುಡೆದಿ ಪಣ್ಣೆರ್, "ಯಾನ್ ಮಲ್ದ್‌ಜಪ್ಪಾ, ಯಾನ್ ಪಿದಾಯೆ ಇತ್ತೆ. ಇರೆ ಮರ್ಮಲೆಡ ಕೇಣ್ಣೆ". ಪಂದೆರೇ ಮರ್ಮಲೆನ್ ಲೆತ್ತ ಕೇಂಡೆರ್. ಆಲ್, "ಅಂದ್ ಅಟಲ್ ಯಾನ್ ಮಲ್ಪಿನಿ. ಆಂಡ ಯಾನ್ ದಾಲ ಪಾಡ್‌ಜಿ" ಇನ್ನೊಲು.

ಪಂದೆರ್ ಕೋಪೊಡು ಉಲಯಿತ ಕರ್ನಗೆಗ್ ರಡ್ಡ್ ಹಾಕಿಯೆರ್, ಸೋಕ ಬುಡ್ಯೆರ್, "ದಂಡ್‌ಗ್ ಪಿದಾಡ್‌ಗ ಒಂಜಿ ಪುಂಡಿ ನುಪ್ಪು ಉನರೆ ಎಂಕ್‌ದಾಂತೆ ಪೋಂಡು. ಎನ್ನ ಈತ್ ಮಲ್ಪ ಸಾವುರ ಮುಡಿ ಉಟ್ಟೊಲಿ ಇತ್ತದ್ ದಾನಿ ಪಲ" ಇಂದ್ ಬೇಚಾರ್‌ಡ್ ಲಕೊಂದು ಪೋಯೆರ್.

ಇಂಚಿಡ್ ಉಲಯಿದ, ಪಿದಯಿತ್ತ ಕರ್ನಗೆನಕುಲು ಬಾರೀ ಸೋಕ ಬುಡ್ಯೆರ್. ದುವಾಲ್ ಪಂದೆದಿ ಅಕಲೆಗ್ ನಾನಾ ನಮುನಿ ಬಂಞ ಕೊಯೊಲು. ಕಿಚ್ಚಿ ಮಚ್ಚೆರೊಡು ಅಕಲೆನ್ ಉಪಾಸ ಪಾಡ್, ಎಣ್ಣೆಡ್ ಉಪ್ಪು ಪಾಡ್ ಕೊಯೊಲು.

ಪಂದೆರ್ ದಂಡ್‌ಡ್ ಪಿರ ಬತ್ತೆರ್. ಬನ್ನಗ ಜಮಾದಿ ಪೋದು ತೊಡಮೆಡ್ ಕುಲ್ಲದೆ. "ದಾನಿ ಮುಲ್ಪ ಕುಲ್ಪಿನಿ" ಇಂದ್ ಕೇಂಡೆರ್. "ಪಂದೆರೇ, ಪೋದು ಇರೆನ ಸಂತಾನದ ಕೊಡಿಕುಲು ಉಲ್ಲನಾಂದ್ ತೊಲೆ" ಇನ್ನೆ.

ಪಾರ್ ಪೋದು ತೂಯ್ಲೆರ್. ಮರ್ಮಲಲ್ಲು ಇರ್ವೆರ್ಲ ಇಜ್ಜೆರ್. ಓಲೋಲು ನಾಡ್‌ಂಡಲಾ ತಿಕ್‌ಚೆರ್. "ಕರ್ನಗಾ, ಕರ್ನಗಾ" ಇಂದ್ ಲೆಪ್ಪುವೆರ್. ಲೆಪ್ಪುನಗ ಅಕುಲು ತೋಜುಚೆರ್. ಆಂಡ ರಡ್ಡ್ ಸೊರ ಕೇನೊಂಡು, "ಮಾಮಾಜೇ ನನ ಎಂಕಲೆನ್ ಲೆಪ್ಪಡೆ, ಎಂಕುಲು ಮಾಯೊಡುಲ್ಲ!"

ಪಂದೆರೆರ್ ಸೋಕ ತಡೆಯೆರೆ ತೀರೊಜಿ. ಮಂಡ ಮಂಡೆ ದರ್ತೊಂಡೆರ್. ನನ ಎಂಕ್ ಇಲ್ಲ ದೇಗ್, ಬದ್ಕ ದೇಗ್, ಈ ಮಲ್ಲಾರ ಬೂಡು ಸಂತಾನ ಸಂತೇಸಿಗ್ ಆಲ್ಕರೆ ಉಪ್ಪಡ್, ಎಂಕ್ ಒವುಲಾ ಬೊಡ್ಡಿ ಇಂದ್ ಆರ್ ಊರು ಬುಡ್ಡು ಪೋಪೆರ್.

ಬೂಡು ಬೊಕ್ಕ ಅರೆನ ಸಂತಾನ ಕುಟುವೊಗು ಆಂಡ್. ಅವೆನ್ ಊರುಗು ಒಂಜೊಂಜಿ ಪಣ್ಣೆರ್, ಯಾನ್ ಇಂಚ ಪಣ್ಣೆನೆನ್ ಕೇಂದೆ.

○ ಕತೆ ಪಂಡಿನಾರ್ : ಶ್ರೀಮತಿ ಕಮಲ, ಕಟ್ಟಿಂಗೇರಿ

ಜೋಕ್ಷೆ ಗಾಡ್ ತುಳು ಕತೆಕ್ಕುಲು

- | | |
|------------------------------------|-------------------------------|
| 1. ಕೋಟಿ - ಚೆನ್ನಯ | : ಡಾ. ವಾಮನ ನಂದಾವರ |
| 2. ಅಕ್ಕರಸು ಸಿರಿ | : ಎ.ವಿ. ನಾವಡ |
| 3. ಕೋಡ್ಡಬ್ಬು | : ಡಾ. ಸುಶೀಲಾ ಉಪಾಧ್ಯಾಯ |
| 4. ಪರತಿ ಮಂಗನೆ | : ಕೆ. ಲೀಲಾವತಿ |
| 5. ಪುಳೂರ ಬಾಚೆ | : ವೆಂಕಟರಾಜ ಪುಣಂಚತ್ತಾಯ |
| 6. ಅಬ್ಬಗೆ ದಾರಗೆ | : ಕೆ.ಜೆ. ಶೆಟ್ಟಿ ಕಡಂದಲೆ |
| 7. ಮೂಂಕು ಸಂಬಳೊ | : ಡಾ. ಕೆ. ಚಿನ್ನಪ್ಪ ಗೌಡ |
| 8. ಮಗೆ ಬರವು ಕಲೆ | : ಕನರಾಡಿ ವಾದಿರಾಜ ಭಟ್ |
| 9. ಮಾಯಂದಾಳ್ | : ಯಶವಂತಿ ಸುವರ್ಣ |
| 10. ಕಲ್ಲುಟಿ - ಕಲ್ಲುಡೆ | : ಅಮೃತ ಸೋಮೇಶ್ವರ |
| 11. ಬನ್ನಾಲ್ | : ಕ್ಯಾಥರಿನ್ ರಾಡ್ರಿಗಸ್ |
| 12. ಮಾಮಿ ಮರ್ಮಲ್ | : ಡಾ. ಗಣನಾಥ ಶೆಟ್ಟಿ ಎಕ್ಕಾರು |
| 13. ಜೋಗಿ ಪುರುಸೆರ್ | : ಕುದ್ಯಾಡಿ ವಿಶ್ವನಾಥ ರೈ |
| 14. ಅಗೋಳಿ ಮಂಜನೆ | : ಗಣೇಶ ಅಮೀನ್ ಸಂಕಮಾರ್ |
| 15. ಕಣ್ಣ್ಡ್ ತೂವಂದಿನ ಕೆಬಿಟ್ ಕೇನಂದಿನ | : ಕೆ.ಆರ್. ರೈ |
| 16. ಅಪ್ಪೊದಡೈ | : ಮುದ್ದು ಮೂಡುಬೆಳ್ಳೆ |
| 17. ನಾಗಸಿರಿ | : ಅನಂತರಾಮ ಬಂಗಾಡಿ |
| 18. ಮಾಯೊದ ಪೊಣ್ಣು | : ಡಿ. ಯದುಪತಿ ಗೌಡ |
| 19. ಮುಡಿಪ್ಪೆರಾವಂದಿ ಮಲ್ಲಿಗೆ | : ಎನ್. ಕೊಯಿರಾ ಬಾಳೆಪುಣೆ |
| 20. ಭೂತಾಳ ಪಾಂಡೈ | : ಡಾ. ಪಾಲ್ತಾಡಿ ರಾಮಕೃಷ್ಣ ಆಚಾರ್ |